

Udhëzuesi i Drejtuesit – Të Çliruar!

Çdo ditë e 10 Ditëve të Lutjes do të përfshijë tre pjesë:

1. Koha Personale me Perëndinë (Përkushtimi Personal)

Shijojeni këtë pjesë të ditës gjatë kohës suaj personale me Perëndinë. Çdo fëmijë që është mjaftueshëm i rritur për të lexuar, çdo i ri dhe çdo i rritur ftohet të takojë Perëndinë në Fjalën e shkruar, të lutet dhe të ecë me Jezusin.

2. Rrethi i Familjes/Miqve (Adhurimi Familjar)

Ftoni familjen ose miqtë tuaj për të kaluar kohë së bashku. Këdo që e konsideroni familje mund të jetë pjesë e kësaj kohe. Lutuni fillimisht për ta dhe pastaj mbliidhuni për këtë kohë të çmuar në Fjalën e Perëndisë dhe në lutje.

3. Familja e Kishës (Takimi i Përditshëm i Mbrëmjes)

Ftoni kishën tuaj, fqinjët dhe miqtë e komunitetit të mbliidhen një herë në ditë për lutje dhe për aktivitete. Lutuni me zell që Perëndia t'ju zbulojë kë duhet të ftoni, përveç anëtarëve aktivë të kishës suaj. Duke u lutur, konsideroni të ftoni në mënyrë personale anëtarët joaktivë, ish-anëtarët, shokët e klasës, kolegët e punës dhe pastorët e besimeve të tjera.

PARIME PËR T'I BËRË 10 DITËT E LUTJES PËR TË GJITHË BREZAT

1. Grupi ynë i lutjes do të mbliidhet dhe do të caktojë partnerë lutjeje për t'u lutur çdo ditë me emër për çdo fëmijë, të ri dhe të rritur. Nëse është e mundur, këtë do ta bëjmë për muaj të tërë para se të fillojmë 10 Ditët e Lutjes. Do të zgjedhim partnerë lutjeje për t'u lutur me emër për 10 persona para dhe gjatë 10 Ditëve të Lutjes. Do të lutemi që Fryma e Shenjtë të përgatisë çdo zemër për të pranuar Fjalën e shkruar të Perëndisë dhe për t'u mbushur me Frymën e Shenjtë.

2. Do ta përdorim Fjalën e shkruar të Perëndisë si burimin tonë kryesor të frymëzimit. Do të bëjmë gjithçka që është e mundur për të siguruar Bibla për të gjithë të rriturit dhe fëmijët mjaftueshëm të rritur për të lexuar. Gjithashtu, çdo ditë do të bekohemi me fjalë frymëzimi nga Ellen G. White.

3. Ne që angazhohemi të thërrasim familjen e kishës sonë në lutje, para së gjithash do të angazhohemi për:

- Të kaluar çdo ditë kohë personale me Perëndinë në lutje dhe në Fjalën e Tij.
- T'ju dorëzuar Jezusit si Zot.
- Të kërkuar dhe për të marrë me anë të besimit pagëzimin e Frymës së Shenjtë.

4. Do të përfshijmë të gjitha moshat në grupe të vogla prej gjashtë personash ose më pak, të udhëhequra nga një student dhe një i rritur për çdo takim të familjes së kishës.

5. Do t'i zgjedhim këta udhëheqës të grupeve të vogla (dy për çdo grup: një i rritur dhe një fëmijë/i ri) përmes lutjes së zellshme dhe pritjes të Perëndia dhe do t'i pajisim këta udhëheqës për të udhëhequr njerëzit e tyre si bërës dishepujsh.

6. Do të përfshijmë sa më shumë njerëz nga mosha të ndryshme të jetë e mundur në çdo pjesë të drejtimit të këtyre 10 Ditëve të Lutjes dhe do të synojmë që çdo pjesë të jetë e kuptueshme për një fëmijë 10-vjeçar.
7. Do t'i bëjmë lutjet tona të shkurtra që sa më shumë persona në grup të mund të marrin pjesë. Në përgjithësi, një lutje me një ose dy fjali është e mjaftueshme dhe e mban kohën e lutjes tërheqëse për fëmijët dhe të rinjtë.
8. Do të synojmë të udhëheqim çdo person që të marrë pjesë aktivisht në 10 Ditët e Lutjes, dhe jo të jetë spektator.
9. Do të këndojmë këngë që përfshijnë të gjitha brezat dhe që ndihmojnë çdo fëmijë, të ri dhe të rritur të dijë se kanë vendin e tyre në adhurim.
10. Do t'ia dorëzojmë planet tona për çdo takim drejtimit të Frymës së Shenjtë.
11. Do të ofrojmë një darkë të thjeshtë dhe të lehtë përpara çdo takimi të familjes së kishës për të inkurajuar bashkësinë e besimtarëve, si në librin e Veprave (shih Veprat 2:42).

SI T'I DREJTONI 10 DITËT E LUTJES PËR TË PATUR NDIKIM MAKSIMAL

1. Dhjetë ditë para se të fillojnë 10 Ditët e Lutjes: Lexoni dhe lutuni bazuar tek të gjitha pjesët e udhëzuesve ditorë: Koha Vetëm me Perëndinë, Rrethi i Familjes/Miqve dhe Familja e Kishës.
2. Gjatë 10 Ditëve të Lutjes: Lexoni dhe lutuni sërish bazuar te çdo udhëzues ditor. Shpresojmë që personalisht të përjetoni fuqinë e Fjalës së Perëndisë të shoqëruar me Frymën e Shenjtë, përpara se ta ftoni kishën tuaj të bëjë të njëjtën gjë.
3. Bëjini pjesët Kohë Personale me Perëndinë dhe Rrethi i Familjes/Miqve të disponueshme çdo ditë për të gjithë ata që marrin pjesë në takimin e mbrëmjes së Familjes së Kishës.
4. Për takimin e Familjes së Kishës çdo ditë:
 - Lutuni me të gjithë drejtuesit e grupeve të vogla, drejtuesit e lutjes dhe drejtuesit e këngëve 30 minuta para se të fillojë takimi.
 - Udhëhiqni të gjitha grupet e vogla nga përpara kishës, me lutje dhe udhëzim nga Bibla, në mënyrë që grupet e vogla të aktivizohen dhe të bashkohen në lutje dhe në studimin e Fjalës së Perëndisë.
 - Bëjeni vetë Sfidën 24-Orëshe çdo ditë, që të jeni autentikë kur të pyesni se çfarë ka bërë secili me sfidën ditën pasuese.
 - Ndani me lutje thirrjen e sugjeruar nga zemra juaj. Mos e lexoni. Lutuni me ata që përgjigjen dhe me ata që nuk përgjigjen.
 - Përgatituni të ndani dëshminë tuaj personale për mënyrën se si pasazhi biblik, për çdo takim, ndikon në mënyrën se si jetoni. Ndani dëshminë tuaj përpara thirrjes duke theksuar fuqinë transformuese të Krishtit përmes Frymës së Shenjtë, jo fuqinë tuaj.
 - Mbylleni takimin duke falënderuar të gjithë për pjesëmarrjen në atë që Perëndia po bën gjatë 10 Ditëve të Lutjes.
 - Pas çdo takimi, bëhuni të disponueshëm për takime shtesë me ata që kanë pyetje ose kanë nevojë për lutje.

5. Planifikoni një Takim “Çfarë Vjen Më Pas?” që të pasojë menjëherë 10 Ditët e Lutjes. Këto 10 ditë lutjeje nuk janë një qëllim në vetvete. Fryma e Shenjtë është më se gati t’i bëjë këto takime një katalizator për mision personal, familjar dhe të familjes së kishës në komunitetin tuaj dhe në botë! (Shihni skicën e përfshirë për Takimin “Çfarë Vjen Më Pas?”.)

JA ÇFARË JU NEVOJITET PËR TAKIMET E MBRËMJES SË FAMILJES SË KISHËS:

- Një hapësirë takimi mjaftueshëm e madhe për të mbajtur të gjithë pjesëmarrësit të ulur në grupe të vogla prej gjashtë personash.
- Një udhëheqës lutjeje i përshtatshëm për të drejtuar seancat e mbrëmjes së Familjes së Kishës nga përpara kishës.
- Anëtarë shtesë të ekipit të lutjes për të planifikuar dhe për të përgatitur këngë për kohët e lutjes në grup.
- Dy udhëheqës (një i rritur dhe një i ri) për çdo grup të vogël prej gjashtë personash.
- Bibla për të gjithë pjesëmarrësit (mund t’i sjellin të tyre ose mund t’i siguroni ju).
- Kopje të udhëzuesve ditorë të lutjes për pjesëmarrësit (ose ofroni akses digjital nëse preferohet).
- Për Takimin “Çfarë Vjen Më Pas?": një tabelë e madhe e bardhë, markera, letra ngjyeshme ose letër/shirit ngjyesh.

ORARI I REKOMANDUAR PËR TAKIMET E MBRËMJES SË FAMILJES SË KISHËS (ME KOHË TË SUGJERUAR)

6:00 Darkë e lehtë

6:30 Lutje me të gjithë udhëheqësit e grupeve të vogla, udhëheqësit e lutjes dhe udhëheqësit e këngëve

7:00 Mirëseardhje (fillimisht nga përpara dhe më pas në grupe të vogla)

7:03 Adhurim përmes Lutjes

Falënderim/Lavdërim (njëra ose tjetra)

Rrëfim/Pendim (njëra ose tjetra)

Kërkesa

7:25 Dëshmi

(tregime në grupe se çfarë ju ka ndihmuar Perëndia të bëni me Sfidën 24-Orëshe)

7:30 Aktivitet

7:35 Adhurim përmes Biblës (Lexim Bible dhe diskutim)

7:45 Fokus Lutjeje

7:55 Thirrje/Lutje/Ndarje e Sfidës 24-Orëshe

8:00 Falenderim për pjesëmarrjen dhe largim

Materialet e Dhjetë Ditëve të Lutjes përgatiten nga Shoqata Ministeriale, Konferenca e Përgjithshme e Adventistëve të Ditës së Shtatë. E drejta e autorit © 2025. Kontribues Kryesor: Don MacLafferty. Përveç rasteve kur shënohet ndryshe, pasazhet biblike janë marrë nga The New King James Version, e drejta e autorit © 1979, 1980, 1982, Thomas Nelson, Inc., Botues.

Hyrje

Mirë se vini në **TË ÇLIRUAR!** Ne besojmë se Jezusi po vjen së shpejti. Prandaj tema e 10 Ditëve të Lutjes për këtë vit ka të bëjë plotësisht me ftesën e Frymës së Shenjtë që të transformojë jetët tona dhe botën tonë. Bashkohuni me ne teksa e kërkojmë Perëndinë për 10 ditë ringjalljeje të udhëhequr nga Fryma.

Para se të vdiste, Jezusi u premtoi ndjekësve të Tij dhuratën e Frymës së Shenjtë: “Dhe unë do t’i lutem Atit dhe ai do t’ju japë një Ngushëllues tjetër, që do të qëndrojë përgjithmonë me ju, Frymën e së Vërtetës, që bota nuk mund ta marrë, sepse nuk e sheh dhe nuk e njeh; por ju e njihni, sepse qëndron me ju dhe do të jetë në ju.” (Gjoni 14:16, 17). Më vonë, pak përpara se të largohej nga kjo tokë për të përgatitur një vend për ne në përjetësi, Jezusi i urdhëroi dishepujt e Tij të qëndronin në Jeruzalem dhe të “prisnin Premtimin e Atit”, që ishte pagëzimi i Frymës së Shenjtë (Veprat 1:4, 5).

Megjithatë, kjo Dhuratë e premtuar ende mbetet gjerësisht e pahapur nga populli i Perëndisë. Ne flasim për këtë Dhuratë, e studiojmë dhe e analizojmë atë, por shumë shpesh nuk arrijmë ta hapim kurrë.

Pa dyshim, vetëm Fryma e Shenjtë mund t’i ripërtërijë zemrat tona mëkatare: “Do t’ju jap një zemër të re dhe do të shtie brenda jush një shpirt të ri” (Ezek. 36:26).

Vetëm Fryma e Shenjtë mund t’i transformojë fëmijët tanë: “Sepse unë do të derdh ujë mbi atë që ka etje dhe rrëke mbi tokën e thatë; do të derdh Frymën time mbi pasardhësit e tu dhe bekimin tim mbi trashëgimtarët e tu.” (Isa. 44:3). Dhe vetëm Fryma e Shenjtë na lidh me familjen qiellore të Perëndisë: “Vetë Fryma i dëshmon frymës sonë se ne jemi bij të Perëndisë.” (Rom. 8:16).

Më e mira nga të gjitha, Perëndia është më se i gatshëm të na japë Frymën e Shenjtë: “Nëse ju, pra, që jeni të këqij, dini t’u jepni dhurata të mira bijve tuaj, aq më tepër Ati juaj qiellor do t’u dhurojë Frymën e Shenjtë atyre që ia kërkojnë”. (Luka 11:13).

Premtimi është tashmë aty, duke pritur që ne ta kërkojmë. Ellen White shkruan: “Sikur të ishin të gatshëm, të gjithë do të mbusheshin me Frymën e Shenjtë. Kudo që nevoja për Frymën e Shenjtë nuk mendohet mjaftueshëm, shihet thatësi e shpirtërore, errësi e shpirtërore, rënie shpirtërore dhe vdekje.” Ajo gjithashtu pyet: “Meqenëse kjo është mënyra me të cilën ne duhet të marrim fuqi, pse nuk kemi uri dhe etje për dhuratën e Frymës? Pse nuk flasim për të, nuk lutemi për të dhe nuk predikojmë për të?” (Veprat e Apostujve, f. 50).

Fryma e Shenjtë që banon brenda nesh na mbush me dashurinë e Atit dhe na fuqizon të jemi dëshmitarë të guximshëm dhe të efektshëm të Krishtit. Pse mos e kërkojmë këtë Dhuratë?

SHIKO TOKËN TË DRIDHET

Te 1 Samuelit 14 gjejmë historinë frymëzuese të Jonatanit dhe të shqyrtarit të tij. Ndërsa babai i tij, mbreti Saul, nuk po bënte asgjë nën një pemë shege, Jonatani dhe shqyrtari i tij besnik dolën nga zona e tyre e sigurt për të synuar lavdinë e Perëndisë. Ushtria filistine kishte terrorizuar Izraelin; tani ushtria e tyre e madhe ishte e vendosur përballë, përtej një gryke të thellë, duke pritur të përfshihej në betejë me Izraelin.

Të shtyrë nga besimi në Zot, Jonatani dhe shqyrtari i tij zbritën me vështirësi në grykë dhe u ngjitën në shkëmbinjtë e pjerrët në anën tjetër për t'u përballur vetëm me ushtrinë armike. Pa frikë, këta dy luftëtarë u përballën me filistinët me fuqinë e Zotit. Ata luftuan kundër të gjithë garnizonit të ushtarëve dhe vetë Perëndia ndërhyri. Bibla thotë se një “dridhje nga Perëndia” tronditi kampin, fushën dhe gjithë popullin (1 Sam. 14:15, Përkthimi Literal i Young). Ishte besimi i Jonatanit ai që i dha Perëndisë një arsye për ta bërë tokën të dridhej përpara këtyre dy heronjve të rinj. Nëse Perëndia nuk do të kishte ndërhyrë duke sjellë një tërmet, Jonatani dhe shqyrtari i tij do të ishin mposhtur lehtësisht.

Perëndia ende e lëviz tokën edhe sot. Bashkohuni me ne në lutje: “O Perëndi, çfarë do të të jepte Ty një arsye, për 10 ditë radhazi, që ta bëje tokën të dridhet?”

Dy mijë vjet më parë, rreth 120 besimtarë u mbledhën në një sallë në katin e dytë të një shtëpie, mbi rrugët e mbushura të Jerusalemit. Ata guxuan të besonin në premtimin e Jezusit për Frymën e Shenjtë. Ata guxuan t'i bindeshin urdhrin të Jezusit për të pritur këtë Dhuratë (Veprat 1, 2).

Kështu ata u mbledhën dhe pritën. Dhe kur Fryma e Shenjtë zbriti në Ditën e Rrëshajëve, besimtarët u çliruan si dëshmitarë të gjallë të Shpëtimtarit të ringjallur, Jezus Krishtit! Ata i deshën familjet e tyre dhe familjen e besimit si kurrë më parë. Ata dhanë në mënyrë sakrifikuese si kurrë më parë. Ata u ngritën dhe guxuan të flisnin për Krishtin si kurrë më parë.

Frymës së Shenjtë i pëlqen të veprojë nga brenda jashtë! Ju ftojme t'i përjetoni këto 10 Ditë Lutjeje jo si një program, por si një mënyrë të re jetese.

TË ÇLIRUAR përfshin tre pjesë të përditshme:

1. Kohë Personale me Perëndinë

Filloni secilën nga 10 ditët me lutje personale dhe me studimin e Biblës.

2. Rrethi i Familjes/Miqve

Kaloni kohë duke mbledhur familjen ose rrethin tuaj të miqve në lutje të përditshme.

3. Familja e Kishës

Bashkohuni me familjen tuaj të kishës për një takim ditor lutjeje që përfshin të gjitha brezat.

Mblidhni miqtë tuaj, anëtarët e kishës, kolegët e punës, të rinjtë dhe fëmijët e të gjitha moshave për 10 ditë ringjalljeje shpirtërore. Ka ardhur koha të çlirohemi plotësisht sërish me anë të Frymës së Shenjtë!

Takimi Final: “Çfarë Vjen Më Pas?”**Përdorimi i materialeve, nëse janë të disponueshme:**

- 1 tabelë e madhe shkrimi, ku vizatojmë një tabelë të ndarë në 4 pjesë, OSE 4 tabela të vogla të qëndrueshme.
- Fletë të vogla ngjitëse (nëse janë të disponueshme) OSE copa të vogla letre me ngjitës mbrapa për tu ngjitur në tabelë.
- Bojra për të shkruar titujt në secilën ndarje të tabelës OSE letër, bojëra dhe shirit ngjitës nëse titujt do t'i vendosni në një sipërfaqe tjetër (jo në tabelë).

Pse?

Fryma e Shenjtë ka vepruar në jetën tuaj dhe në kishën tuaj! Pas 10 Ditëve të Lutjes, mbledhni menjëherë njerëzit e Perëndisë për të lutur dhe për të kërkuar agjendën e Tij. Mund të bini pre e rrezikut për tu kthyer në rutinat e vjetra sepse mund të humbisni momentin që Perëndia krijoi gjatë këtyre ditëve të lutjes që transformojnë jetën. Planifikoni të takoheni së shpejti!

Çfarë?

Ky është një takim për të kërkuar atë që Perëndia na thërret të bëjmë më tej në katër fusha:

1. Personale
2. Rrethi i Familjes/Miqve
3. Familja e Kishës
4. Komuniteti/Bota

Si?

Ja një sugjerim për mënyrën e zhvillimit të takimit. Lutuni dhe kërkon nga Perëndia nëse ka diçka për të shtuar ose hequr nga ky udhëzues për kishën tuaj.

Udhëzuesi i Takimit Final**Fillimi i Takimit**

Lëri familjet ose çiftet të ulen së bashku. Të tjerët le të formojnë grupe të vogla miqsh, duke siguruar që të përfshihet secili. Liderët të jenë të gatshëm për të ndihmuar në organizimin e grupeve.

Mirëseardhja dhe Lutja

Aktivitet

DREJTUESI U THOTË TË GJITHËVE: Diskutoni këto pyetje me grupin tuaj të familjes ose të miqve:

1. Përmendni një ngjarje jetësore për të cilën ndiheshit më i/e përgatitur.
2. Tani, përmendni një ngjarje jetësore për të cilën ndiheshit më pak i/e përgatitur.

Adhuroni Zotin me Mirënjohje**(TË GJITHË)**

1. Këndoni një këngë falenderimi me të gjithë grupin.
2. Ftoni vullnetarë që të tregojnë se çfarë bëri Jezus Krishti në jetën e tyre gjatë 10 Ditëve të Lutjes.
3. Këndoni përsëri një këngë falenderimi.
4. Lutuni që Fryma e Shenjtë të vijë dhe të drejtojë këtë takim.
5. Lexoni Efesianëve 3:20–21 me grupin. Si duhet të ndikojë ky varg në kishë ndërsa përgatitemi për hapat e ardhshëm? Ftoni vullnetarë që të ndajnë mendimet e tyre.

Tabela me Katër Ndarje

Merrni një tabelë të madhe dhe ndajeni në katër pjesë (ose katër tabela të vogla që të mund të shihen nga i gjithë grupi). Titujt e ndarjeve: **PERSONALE, FAMILJA/MIQTË, FAMILJA E KISHËS, KOMUNITETI/BOTA.**

UDHËHEQËSI U THOTË TË GJITHËVE: Po i kërkojmë Perëndisë të na tregojë hapa të qarta për të hedhur në katër fusha. Nuk po kërkojmë ide të përgjithshme, por ide specifike dhe të matshme. (P.sh.: JO “Të jem më shumë shpirtëror”, por “Të kaloj kohë të panxituar me Zotin në Fjalën e Tij dhe të lutem PARA se të ha mëngjesin çdo ditë.”)

Personale

1. Jepini secilit një letër të vogël që ngjitet nga mbrapa dhe një stilolaps, përfshini të gjitha moshat.
2. Ftoni të gjithë të kalojnë një moment lutjeje në heshtje. Kërkoni nga Perëndia një hap të vetëm që po thërret secilin për t’u marrë personalisht në ringjalljen e vazhdueshme me Jezusin.
3. Shkruajeni në një frazë ose një fjali të shkurtër. Ngjitni shënimin në seksionin **Personale**. (Secili mund ta mbajë shënimin privatisht, nëse dëshiron.)

Familja/Miqetë

1. Jepini çdo grupi familjar/miq një letër të vogël që ngjitet nga mbrapa.
2. Ftoni grupet të luten së bashku. Kërkoni nga Perëndia një hap që do të ndihmojë familjen ose kishën të përjetojë ringjallje të përditshme me Jezusin.
3. Diskutoni.
4. Shkruani hapin në një frazë të shkurtër dhe ngjitni shënimin në seksionin **Familja/Miqetë**.

Familja e Kishës

1. Lërimi njerëzit të rikthehen në grupet e vogla origjinale nga 10 Ditët e Lutjes (6 ose më pak). Për pjesëmarrësit e rinj që nuk kanë grup, caktojini në një grup ekzistues. Liderët e lutjes ndihmojnë në zhvendosjen e grupeve dhe karrigeve.

2. Grupi i vogël lutet së bashku. Kërkoni një hap që do të ndihmojë familjen e kishës të përjetojë ringjallje të përditshme me Jezusin.
 3. Diskutoni.
 4. Shkruani hapin dhe ngjiteni shënimin në seksionin **Familja e Kishës**.
-

Komuniteti/Bota

1. Jepini një letër të vogël që ngjitet nga mbrapa çdo grupi të vogël.
 2. Ftoni grupet të lutën. Kërkoni nga Perëndia që t'ju tregojë një mënyrë për t'u angazhuar me komunitetin dhe botën për ndarjen e lajmit të mirë përreth Jezusit. Mundohuni të mendoni diçka të përshtatshme dhe aktuale.
 3. Diskutoni.
 4. Shkruani hapin në një fjali dhe ngjiteni shënimin në seksionin **Komuniteti/Bota**.
-

(TË GJITHË)

Bëni një rreth dhe lutuni që Perëndia të bekojë këta hapa të ardhshëm.

Tregojuni pjesëmarrësve të 10 Ditëve të Lutjes se pastorët ose elderat do të studiojnë këto shënime, do të luten për to dhe do të bëjnë rekomandime për mbledhjet e bordit dhe anëtarët e kishës për hapat e ardhshëm që kisha mund të ndërmarrë së bashku. Angazhohuni për një stil jetese të rinovuar lutjeje. Prisni që Fryma e Shenjtë të çlirohet me fuqi në shtëpinë dhe në kishën tuaj!

Materiali është përshtatur nga *The Last Elijah* nga Don MacLafferty

TË ÇLIRUAR !**DITA 1 — Ta Njohim Jezusin si Shpëtimtarin Tonë të Gjallë****Veprat 1:1–3**

KOHA PERSONALE ME PERËNDINË**Lutje**

Përdorni Psalmin 119:105 si model lutjeje. Kërkojini Perëndisë të dërgojë Frymën e Shenjtë që ta bëjë Fjalën e shkruar një dritë për ecjen tuaj të besimit.

Eksploroni Biblën

1. Lexoni Veprat 1:1–3. Çfarë ju mëson ky pasazh për Jezusin?
2. Eksploroni katër Ungjijtë për të parë sa herë Jezusi iu shfaq ndjekësve të Tij **IGJALLË** pas ringjalljes së Tij. (Shihni Mat. 28:9–20; Marku 16:9–20; Luka 24:13–53; Gjoni 20:14 deri 21:25.)

Mendime nga Ellen White:

Për dyzet ditë Krishti qëndroi mbi tokë, duke i përgatitur dishepujt për misionin që kishin para dhe duke iu shpjeguar atë që deri atëherë ata nuk kishin qenë në gjendje ta kuptonin. Ai foli për profecitë që kishin të bënin me ardhjen e Tij, refuzimin e Tij nga judenjtë dhe vdekjen e Tij, duke treguar se çdo hollësi e këtyre profecive ishte përmbushur. Ai u tha atyre se këtë përmbushje të profecive duhej ta shikonin si një siguri të fuqisë që do t'i shoqëronte në punët e tyre të ardhshme. “Atëherë ua hapi mendjen,” lexojmë, “që të kuptonin Shkrimet dhe u tha: Kështu është shkruar dhe kështu duhej që Krishti të vuante dhe të ringjallej nga të vdekurit ditën e tretë; dhe që në emrin e Tij të predikohet pendimi dhe falja e mëkateve midis të gjitha kombeve, duke filluar nga Jeruzalemi.” Dhe Ai shtoi: “Ju jeni dëshmitarë të këtyre gjërave.”

Gjatë këtyre ditëve që Krishti kaloi me dishepujt e Tij, ata fituan një përvojë të re. Teksa dëgjonin Mësuesin e tyre të dashur duke u shpjeguar Shkrimet në dritën e gjithçkaje që kishte ndodhur, ata besuan plotësisht në Të. Ata arritën në atë pikë sa mund të thoshin: “E di kujt i kam besuar.” 2 Timoteut 1:12. Ata filluan të kuptonin natyrën dhe shtrirjen e punës së tyre, të shihnin se duhej t’ia shpallnin botës të vërtetat që u ishin besuar. Ngjarjet e jetës së Krishtit, vdekja dhe ringjallja e Tij, profecitë që tregonin për këto ngjarje, misteret e planit të shpëtimit, fuqia e Jezusit për faljen e mëkateve, për të gjitha këto ata kishin qenë dëshmitarë dhe duhej t’ia bënin të njohura botës. Ata duhej të shpallnin ungjillin e paqes dhe të shpëtimit përmes pendimit dhe fuqisë së Shpëtimtarit. (Veprat e Apostujve, fq. 26, 27)

Fokus Lutjeje

Kaloni disa çaste duke reflektuar për jetën tuaj. Tregojini Perëndisë disa mënyra se si Jezusi ju ka treguar se Ai është i gjallë! Falenderoni Perëndinë që Jezus Krishti është zbuluar përmes përgjigjeve ndaj lutjes si Shpëtimtari i gjallë.

RRETHI I FAMILJES/MIQVE**Aktivitet**

Ftoni secilin mik ose anëtar të familjes të përshkruajë shkurtimisht diçka pa e përmendur se çfarë është. Jepni një arsye pse e dini që kjo gjë është e gjallë. Të gjithë duhet të përpiqen të hamendësojnë se çfarë po përshkruani. (Për shembull: Ka krahë, luan me erën dhe qëndron mbi lule të bukura nëpër fusha. E di që është e gjallë sepse fluturon!)

Lutje për Frymën e Shenjtë

Lutuni së bashku për Frymën e Shenjtë. Bazohuni te premtimi i Lukës 11:13.

Eksploroni Biblën

1. Lexoni Luka 1:1–4 dhe Veprat 1:1–3. Pse e shkroi Luka Ungjillin e Lukës dhe librin e Veprave?
2. Në ç'mënyrë tregimi i Lukës te Luka 24:36–43 ilustron Veprat 1:3?

Mendime nga Ellen White:

Para se të ngjitej në qiell, Krishti u dha dishepujve të Tij një porosi. Ai u tha se ata do të ishin zbatuesit e testamentit me anën e të cilit Ai i la botës thesaret e jetës së përjetshme. Ju keni qenë dëshmitarë të jetës Sime sakrifikuese për hir të botës, u tha Ai atyre. Ju keni parë veprat e Mia për Izraelin. Dhe megjithëse populli Im nuk erdhi tek Unë që të kishte jetë, megjithëse priftërinjtë dhe sundimtarët më bënë çfarë deshën, megjithëse më hodhën poshtë, ata do të kenë ende një mundësi tjetër për ta pranuar Birin e Perëndisë. Ju e keni parë se të gjithë ata që vijnë tek Unë duke rrëfyer mëkatet e tyre, Unë i pranoj lirisht. Atë që vjen tek Unë nuk do ta nxjerr kurrë jashtë. Këtë mesazh mëshire po ja u besoj Juve, o dishepujt e Mi. Ky mesazh duhet t'u jepet si judenjve, ashtu edhe atyre që nuk janë judenj, së pari Izraelit dhe më pas të gjitha kombeve, gjuhëve dhe popujve. Të gjithë ata që besojnë do të mblidhen në një kishë. (Veprat e Apostujve, fq. 27, 28)

Fokus Lutjeje

Lutuni së bashku që secili person në familjen dhe në rrethin tuaj të miqve ta njohë Jezusin si Shpëtimtarin e gjallë. Pasi të luteni për njëri-tjetrin, lutuni me emër për familjarë dhe miq që nuk e njohin Jezusin në një mënyrë personale dhe të gjallë.

FAMILJA E KISHËS**Procedura për Takimin e Parë të Mbrëmjes**

Natën e parë të 10 Ditëve të Lutjes, ndajini pjesëmarrësit në grupe, ku përfshihen të gjitha brezat, me gjashtë ose më pak persona. Çdo grup do të udhëhiqet nga një i rritur dhe një i ri, siç përshkruhet në udhëzuesin e drejtuesit. Pjesëmarrësit mund të qëndrojnë në të njëjtat grupe për të gjitha 10 ditët. (Nëse njerëz të rinj marrin pjesë në netët pasuese, ndihmojini të bëhen pjesë e një grupi ekzistues ose filloni një grup të ri nëse është e nevojshme.)

Çdo natë, pjesëmarrësit mund të ulen me grupet e tyre ndërsa një drejtues lutjeje i udhëheq të gjithë nëpër lutje dhe aktivitete nga para kishës. Drejtuesit e grupeve të vogla do të lehtësojnë diskutimin në grupet e tyre kur të jetë e nevojshme. Ndonjëherë të gjithë pjesëmarrësit do të ndërveprojnë së bashku, ndonjëherë do të luten dhe do të diskutojnë me anëtarët e grupit të vogël, dhe ndonjëherë do të nxiten të luten në heshtje. Një drejtues lutjeje fleksibël dhe i kujdesshëm mund të kalojë me lehtësi midis aktiviteteve dhe ta përshtasë materialin sipas nevojave lokale.

Mirëseardhje

Adhurim përmes Lutjes

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Lavdërim:

1. **(GRUPET E VOGLA)** Me Biblat tuaja të hapura te Isaia 53, kërkonit cilësi të veçanta të Jezusit. Jepini Perëndisë lavdi për secilën cilësi të Jezusit.
2. **(TË GJITHË)** Këndoni një këngë lavdërimi.

Rrëfim:

1. **(GRUPET E VOGLA)** Lexoni Isaia 53:5. Kaloni kohë për rrëfim personal të mëkateve.
2. **(TË GJITHË)** Këndoni një këngë për hirin e Perëndisë.

Kërkesa:

1. **(GRUPET E VOGLA)** Lexoni Gjonin 16:13. Lutuni që Fryma e Shenjtë të vijë dhe të na mësojë të vërtetën.
2. **(TË GJITHË)** Këndoni një këngë për Frymën e Shenjtë.

Aktivitet

DREJTUESI U THOTË TË GJITHËVE: Formoni grupe dyshe ose treshe. Pyeteni njëri-tjetrin: “Cilat janë tre gjëra që do të donit që njerëzit t’i dinin për ju?” Tregojini njëri-tjetrit për disa minuta. Të gjithë kemi shumë fakte interesante që mund t’i mësojmë për njëri-tjetrin. Pasi Jezusi vdiq në kryq dhe u ringjall nga varri, Ai kishte diçka të veçantë që donte që të gjithë ta dinin për Vetën e Tij.

Adhurim përmes Biblës

(GRUPET E VOGLA)

1. Lexoni Veprat 1:1–3. Ju lutemi, vini re te vargu 3 diçka që Jezusi donte që të gjithë ta dinin. Jezusi “u paraqit i GJALLË pas vuajtjes së Tij, me shumë prova bindëse”.

2. Lexoni Luka 24:13–32. Veçanërisht vini re vargun 27. Çfarë bëri Jezusi për t'iu zbuluar Vetën dy dishepujve?
3. Vini re vargun 32. Cila ishte dëshmia personale e dy dishepujve pasi e kuptuan se kishin qenë me Shpëtimtarin e gjallë?

Mendime nga Ellen White:

Kështu Krishti u foli dishepujve të Tij, duke ua hapur mendjen që të kuptonin Shkrimet. Dishepujt ishin të lodhur, por biseda nuk u shua. Fjalë jete dhe sigurie dilnin nga buzët e Shpëtimtarit. Por sytë e tyre ende ishin të mbuluar. Teksa Ai u tregonte për rrënimin e Jeruzalemit, ata e shikonin qytetin e dënuar me lot, por ende nuk dyshonin se kush ishte shoku i tyre i udhëtimit. Ata nuk mendonin se tema e bisedës së tyre po ecte pranë tyre, se Krishti fliste për Vetën e Tij sikur të ishte një person tjetër. Ata mendonin se Ai ishte një nga ata që kishin marrë pjesë në festën e madhe dhe se tani po kthehej në shtëpinë e Tij. Ai ecte me po aq kujdes sa ata mbi gurët e ashpër, duke ndaluar herë pas here bashkë me ta për një pushim të shkurtër. Kështu ata vazhduan përgjatë rrugës malore, ndërsa Ai që së shpejti do të zinte vendin e Tij në të djathtën e Perëndisë dhe që do të thoshte: “Mua më është dhënë çdo pushtet në qiell dhe në tokë,” ecte pranë tyre. Mateu 28:18. (Biografia e Dashurisë, fq. 800)

Fokus Lutjeje

DREJTUESI U THOTË TË GJITHËVE: Ndonjëherë, si të krishterë, ne veprojmë sikur Jezus Krishti të ishte ende në varr! Jezusi kaloi 40 ditë pas ringjalljes së Tij duke u siguruar personalisht ndjekësve të Tij besnikë se Ai ishte Shpëtimtari i GJALLË.

Le të lutemi në grupet tona që të mos jemi të verbër ndaj Shpëtimtarit tonë të gjallë. Le të lutemi që Perëndia t'i hapë sytë tanë për ta ditur se Jezusi është i gjallë dhe i pranishëm në jetët tona me fuqinë e Frymës së Shenjtë.

Thirrje

DREJTUESI U THOTË TË GJITHËVE: Kush nga ju sonde ndjen bindjen për nevojën për t'ia përkushtuar sërish zemrën Shpëtimtarit të gjallë dhe për ta njohur Atë më shumë çdo ditë? I ftoj të gjithë ata që duan t'ia përkushtojnë sërish zemrat e tyre Jezusit si Shpëtimtarit të gjallë të gjunjëzohen aty ku janë.

Sfida 24-Orëshe

DREJTUESI U THOTË TË GJITHËVE: Në një moment të përshtatshëm gjatë 24 orëve të ardhshme, fikini të gjitha pajisjet elektronike për 10 minuta. Lexoni Psalmin 46 individualisht, vetëm ju dhe Perëndia. Lavdëroni Jezus Krishtin që është Perëndia i gjallë! Kërkojini Frymës së Shenjtë t'ju vendosë në zemër një person dhe tregojini atij personi një arsye pse e dini që Jezusi është i gjallë. Lexoni Veprat 1:6–8 për tu përgatitur për ditën e nesërme.

TË ÇLIRUAR!**DITA 2 — Në përputhje me Prioritetet e Mbretërisë
Veprat 1:6–8**

KOHA PERSONALE ME PERËNDINË**Lutje****Eksploroni Biblën**

1. Lexoni Veprat 1:6–8. Çfarë prioriteti kishin dishepujt në mendjen e tyre?
2. Çfarë prioriteti kishte Jezusi për dishepujt e Tij?
3. Cilat prioritete marrin pjesën më të madhe të energjisë suaj?

Mendime nga Ellen White:

Para se të ngjitej në qiell, Krishti u dha dishepujve të Tij një porosi. Ai u tha se ata do të ishin zbatuesit e testamentit me anën e të cilit Ai i la botës thesaret e jetës së përjetshme. Ju keni qenë dëshmitarë të jetës Sime sakrifikuese për hir të botës, u tha Ai atyre. Ju keni parë veprat e Mia për Izraelin. Dhe megjithëse populli Im nuk erdhi tek Unë që të kishte jetë, megjithëse priftërinjtë dhe sundimtarët më bënë çfarë deshën, megjithëse më hodhën poshtë, ata do të kenë ende një mundësi tjetër për ta pranuar Birin e Perëndisë. Ju e keni parë se të gjithë ata që vijnë tek Unë duke rrëfyer mëkatet e tyre, Unë i pranoj lirisht. Atë që vjen tek Unë nuk do ta nxjerr kurrë jashtë. Këtë mesazh mëshire po ja u besoj Juve, o dishepujt e Mi. Ky mesazh duhet t’u jepet si judenjve, ashtu edhe atyre që nuk janë judenj, së pari Izraelit dhe më pas të gjitha kombeve, gjuhëve dhe popujve. Të gjithë ata që besojnë do të mblidhen në një kishë. (Veprat e Apostujve, fq. 27, 28)

Fokus Lutjeje

Dorëzojani prioritetet tuaja personale Jezusit si Zot. Kërkojini Perëndisë që Mbretëria e Tij të bëhet prioriteti juaj!

RRETHI I FAMILJES/MIQVE
Aktivitet

Ftoni të gjithë të ngrihen në këmbë dhe të mbyllin sytë. Me sytë mbyllur, vendosuni në një vijë të drejtë pa u prekur me njëri-tjetrin. Mund të përdorni vetëm komunikimin me zë për të formuar vijën. Pasi ta formoni vijën, hapini sytë. Si ja dolët?

Lutje për Frymën e Shenjtë

Lutuni së bashku: “O Zot, na i hap sytë me anë të Frymës së Shenjtë që të mund të jemi të bashkuar në misionin Tënd për ne.”

Eksploroni Biblën

1. Lexoni Veprat 1:6–8. Krahasoni kërkesën e Jakobit dhe Gjonit te Marku 10:35–37 me pyetjen e dishepujve te Veprat 1:6. Cila temë pushtonte mendjen e dishepujve?
2. Lexoni Veprat 1:7. Çfarë i tregon përgjigjja e Jezusit familjes suaj për shqetësimet tuaja lidhur me të ardhmen?

Mendime nga Ellen White:

Urdhërimi i ungjillit është autorizimi i madh misionar i mbretërisë së Krishtit. Dishepujt duhej të punonin me zell për shpirtrat, duke ua dhënë të gjithëve ftesën e mëshirës. Ata nuk duhej të prisnin që njerëzit të vinin tek ata; ata duhej të shkonin tek njerëzit me mesazhin e tyre. (Veprat e Apostujve, fq. 28)

Fokus Lutjeje

Formoni një rreth në gjunjë në lutje. Bashkohuni në kërkesën që Perëndia t’ju japë zemrën e Tij për prioritetet e Tij. Kërkoni premtimin e Tij për Frymën e Shenjtë që të mund të jeni dëshmitarët e Tij kudo që të shkoni.

FAMILJA E KISHËS

Mirëseardhje

Adhurim përmes Lutjes

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Lavdërim:

1. **(GRUPET E VOGLA)** Me Biblat tuaja të hapura te Luka 19:10, mendoni disa emra të Jezusit që përshkruajnë prioritetet e Tij (për shembull: Bari). Lavdërojeni Atë për këta emra!
2. **(TË GJITHË)** Këndoni një këngë lavdërimi.

Pendim:

1. **(GRUPET E VOGLA)** Lexoni Luka 19:8. Zakeu u pendua për mëkatet e tij. Kërkojini Perëndisë t’ju ndihmojë të jetoni një jetë pendimi.
2. **(TË GJITHË)** Këndoni një këngë pendimi.

Kërkesa:

1. **(GRUPET E VOGLA)** Lexoni Gjonin 14:16. Lutuni që Fryma e Shenjtë të vijë dhe të jetë Ndhmësi ynë.
2. **(TË GJITHË)** Këndoni një këngë për Frymën e Shenjtë.

Dëshmi

(GRUPET E VOGLA)

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Në një moment të përshtatshëm gjatë 24 orëve të ardhshme, fikini të gjitha pajisjet elektronike për 10 minuta. Lexoni Psalmin 46 individualisht, vetëm ju dhe Perëndia. Lavdëroni Jezus Krishtin që është Perëndia i gjallë! Kërkojini Frymës së Shenjtë t’ju vendosë në zemër një person dhe tregojini atij person një arsye pse e dini që Jezusi është i gjallë. Lexoni Veprat 1:6–8 për tu përgatitur për ditën e sotme).

Aktivitet

DREJTUESI U THOTË TË GJITHËVE: Qëndroni në rreth me grupin tuaj të vogël. Mendoni për një detyrë të rëndësishme që aktualisht është në listën tuaj të gjërave që duhen bërë (si: pagesa e faturave, vrapimi ose riparimi i makinës). Me radhë, interpretojeni atë aktivitet vetëm me veprime, pa përdorur fjalë, ndërsa të tjerët përpiqen ta gjejnë se çfarë është. Të gjithë kemi shumë prioritetë, si urgjente ashtu edhe të rëndësishme, por cilat janë prioritetet që Perëndia ka për ne?

Adhurim përmes Biblës

(GRUPET E VOGLA)

1. Lexoni Veprat 1:6, 7 dhe Mateu 6:33. Si u japin fjalët e Jezusit te Mateu 6:33 kuptim fjalëve të Tij te Veprat 1:6, 7?
2. Lexoni Predikuesi 3:1–11. Çfarë mund të mësojmë në këtë pasazh për dhuratën e kohës dhe prioritetet?

Mendime nga Ellen White:

Dishepujt duhej ta çonin përpara misionin e tyre në emrin e Krishtit. Çdo fjalë dhe vepër e tyre duhej të tërhiqte vëmendjen te emri i Tij, si Ai që zotëron fuqinë jetike me anën e të cilës mëkatarët mund të shpëtohen. Besimi i tyre duhej të përqendrohej tek Ai që është burimi i mëshirës dhe i fuqisë. Në emrin e Tij ata duhej t’i paraqisnin kërkesat e tyre Atit dhe do të merrnin përgjigje. Ata duhej të pagëzonin në emrin e Atit, të Birit dhe të Frymës së Shenjtë. Emri i Krishtit duhej të ishte fjalëkalimi i tyre, shenja e dallimit, lidhja e unitetit, autoriteti për rrugën e tyre të veprimit dhe burimi i suksesit të tyre. Asgjë që nuk mbante emrin dhe vulën e Tij, nuk duhej të njihej në mbretërinë e Tij. (Veprat e Apostujve, fq. 28)

Fokus Lutjeje

UDHËHEQËSI PËR TË GJITHË: Lutuni për prioritetet e Mbretërisë së Krishtit. Lutuni që zemra e Krishtit për të humburit të bëhet zemra juaj.

Thirrje

DREJTUESI U THOTË TË GJITHËVE: Kush nga ju sonte është i bindur se prioritetet e jetës së tij në këto ditë të fundit nuk janë prioritetet e Jezus Krishtit? Ju ftoj të bashkoheni me mua duke i kërkuar Perëndisë t’i riorganizojë prioritetet tona që të përputhen me prioritetet e Mbretërisë së Tij.

Sfida 24-Orëshe

UDHËHEQËSI PËR TË GJITHË: Renditni katër prioritete kryesore që keni në jetën tuaj momentalisht duke u treguar të sinqertë për vendin ku ndodhet zemra dhe fokusi juaj. Lutuni dhe lexoni Jakobi 1:5–8. Kërkojini Perëndisë t’ju tregojë se cilat dëshiron Ai të jenë katër prioritetet tuaja kryesore. Bëni një listë dhe vendoseni atë në një vend ku mund ta shihni çdo ditë. Me ndihmën e Perëndisë, hidhni tani një hap besimi për të jetuar sipas prioriteteve të Tij për jetën tuaj! Lexoni Veprat 1:9–11 për tu përgatitur për nesër.

DITA 3 — Takoni Jezusin Kur Ai ju Befason
Veprat 1:9–11

KOHA PERSONALE ME PERËNDINË**Lutje****Eksploroni Biblën**

1. Lexoni Gjoni 14:1–3. Çfarë po përgatit Jezusi personalisht përpara se të kthehet?
2. Lexoni Veprat 1:9–11. Si do të kthehet Jezusi?

Mendime nga Ellen White:

Kur erdhi koha që Krishti të ngjitej tek Ati i Tij, Ai i çoi dishepujt deri në Betani. Këtu Ai u ndal dhe ata u mblodhën rreth Tij. Me duart e shtrira për bekim, si për t'i siguruar për kujdesin e Tij mbrojtës, Ai u ngjiti në qiell ngadalë nga mesi i tyre. “Ndodhi që, ndërsa Ai i bekonte, u nda prej tyre dhe u ngrit lart në qiell.” Luka 24:51. (Veprat e Apostujve, fq. 32)

Ndërsa dishepujt po shikonin lart për të vështruar për herë të fundit Zotin e tyre që po ngjitej, Ai u prit në radhët gëzimore të engjëjve qiellorë. Ndërsa këta engjëj e shoqëronin drejt oborreve qiellore, ata këndonin me triumf: “Këndojini Perëndisë, o mbretëri të tokës; këndojini lavde Zotit, Atij që shkon me kalë mbi qiejt e qiejve... Pranoni fuqinë e Perëndisë; madhështia e Tij qëndron mbi Izraelin dhe fuqia e Tij është në qiejt.” Psalmi 68:32–34. (Veprat e Apostujve, fq. 32, 33)

Fokus Lutjeje

Kërkojini Perëndisë të përgatisë zemrën tuaj për ta takuar Jezusin së shpejti.

RRETHI I FAMILJES/MIQVE**Aktivitet**

Ftoni të gjithë të mendojnë se sa minuta përpara u pëlqen të arrijnë në një takim të planifikuar.

1. Kërkojuni atyre që u pëlqen të arrijnë herët të ngrenë duart për të treguar sa minuta herët u pëlqen të arrijnë.
2. Kërkojuni atyre që arrijnë me vonesë (pa i vënë në siklet) të ngrejnë duart për të treguar sa minuta janë të gatshëm të vonohen.

Lutje për Frymën e Shenjtë**Eksploroni Biblën**

1. Lexoni Mateu 24:42–44. Si do të jetë ardhja e dytë e Jezusit si një vjedhës?
2. Si mund të përgatitemi më së miri për kthimin e Jezusit?

Mendime nga Ellen White:

Premtimi i ardhjes së dytë të Krishtit duhej të mbahej gjithmonë i freskët në mendjet e dishepujve të Tij. I njëjti Jezus që ata kishin parë duke u ngjitur në qiell, do të vinte përsëri për të marrë pranë Vetës ata që këtui poshtë i kushtojnë veten shërbimit të Tij. I njëjti zë që u kishte thënë atyre: “Ja, Unë jam me ju gjithmonë, deri në fund,” do t’i mirëpriste në praninë e Tij në mbretërinë qiellore. (Veprat e Apostujve, fq. 33)

Fokus Lutjeje

Lutuni së bashku që Fryma e Shenjtë ta përgatisë çdo person në rrethin tuaj për ta takuar Jezusin kur Ai të kthehet.

FAMILJA E KISHËS**Mirëseardhje****Adhurim përmes Lutjes**

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonini.

Lavdëroni Jezusin për ardhjen e Tij!

1. **(GRUPET E VOGLA)** Lexoni Zbulesa 22:7, 12, 13, 20. Zgjidhni një nga këto premtime dhe lavdëroni Jezusin për atë që premtimi thotë rreth Tij.
2. **(TË GJITHË)** Këndoni një këngë për ardhjen e dytë të Jezusit.

Pendim:

1. **(GRUPET E VOGLA)** Lexoni Zbulesa 22:10, 11. Lutuni që Perëndia të na thërrasë të gjithëve në pendim ndërsa kemi ende kohë për t’u kthyer tek Ai.
2. **(TË GJITHË)** Këndoni një këngë pendimi.

Kërkoni Frymën e Shenjtë:

1. **(GRUPET E VOGLA)** Lexoni Zbulesa 22:17. Kërkoni të merrni Frymën e Shenjtë për të shuar etjen tonë shpirtërore. Lutuni që ta gjejmë gëzimin, paqen dhe dashurinë tonë në Frymën e Shenjtë.
2. **(TË GJITHË)** Këndoni një këngë për Frymën e Shenjtë.

Dëshmi**(GRUPET E VOGLA)**

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Renditni katër prioritete kryesore që keni në jetën tuaj momentalisht duke u treguar të sinqertë për vendin ku ndodhet zemra dhe fokusi juaj. Lutuni dhe lexoni Jakobi 1:5–8. Kërkojini Perëndisë t’ju tregojë se cilat dëshiron Ai të jenë katër prioritetet tuaja kryesore. Bëni një listë dhe vendoseni atë në një vend ku mund ta shihni çdo ditë. Me ndihmën e Perëndisë, hidhni tani një hap besimi për të jetuar sipas prioriteteve të Tij për jetën tuaj! Lexoni Veprat 1:9–11 për tu përgatitur për nesër.)

Aktivitet

DREJTUESI U THOTË TË GJITHËVE: Qëndroni në rreth me grupin tuaj të vogël. Kërkojini secilit person, me radhë, të interpretojë me veprime diçka për të cilën është e vështirë të pritët në jetë. Anëtarët e grupit mund të përpiqen të gjejnë se çfarë po interpreton secili.

Adhurim përmes Biblës

(GRUPET E VOGLA)

1. Lexoni 1 Thesalonikasve 4:16–18. Çfarë është ajo që do ta bëjë ardhjen e Jezusit ditën më të mirë në këtë planet?
2. Lexoni Mateu 25:1–13. Çfarë mund të mësojmë nga kjo shëmbëlltyrë rreth përgatitjes për ardhjen e shpejtë të Jezusit?

Mendime nga Ellen White:

Pas ngjitjes së Shpëtimtarit në qiell, ndjenja e pranisë hyjnore, plot dashuri dhe dritë, ishte ende me ta. Ishte një prani personale. Jezusi, Shpëtimtari, që kishte ecur, kishte folur dhe ishte lutur me ta, që u kishte dhënë shpresë dhe ngushëllim zemrave të tyre, ishte marrë larg tyre në qiell ndërsa mesazhi i paqes ishte ende në buzët e Tij. Ndërsa qerret e engjëjve e morën Atë, fjalët e Tij u kishin ardhur atyre: “Ja, Unë jam me ju gjithë ditët, deri në mbarim të botës.” Mateu 28:20. Ai ishte ngjitur në qiell në formën e njerëzimit. Ata e dinin se Ai ishte para fronit të Perëndisë, ende Miku dhe Shpëtimtari i tyre; se ndjenjat e Tij nuk kishin ndryshuar; se Ai do të ishte përgjithmonë i lidhur me njerëzimin që vuan. Ata e dinin se Ai po paraqiste para Perëndisë meritën e gjakut të Tij, duke treguar duart dhe këmbët e Tij të plagosura si një kujtim i çmimit që kishte paguar për të shpënuarit e Tij. Ky mendim u jepte atyre forcë për të duruar përbuzjen për hir të Tij. Bashkimi i tyre me Të ishte më i fortë tani sesa kur Ai ishte me ta personalisht. Drita, dashuria dhe fuqia e një Krishti që banonte brenda tyre shkëlqente përmes tyre, në mënyrë të tillë, që njerëzit, duke i parë, mrekulloheshin. (Veprat e Apostujve, fq. 65)

Fokus Lutjeje

DREJTUESI U THOTË TË GJITHËVE: Lutuni së bashku që Perëndia të na japë ndjesinë e urgjencës në përgatitjen për ta takuar Jezusin ballë për ballë në ardhjen e Tij të dytë.

Thirrje

DREJTUESI U THOTË TË GJITHËVE: Jezusi po përgatit një vend që ju të jetoni me Të në përjetësi. Kush këtu sonte ka nevojë për Frymën e Shenjtë që ta ndihmojë të përgatitet për ardhjen e shpejtë të Jezusit? Ju lutem ejani dhe bashkohuni me mua në lutje.

Sfida 24-Orëshe

Pyeteni Perëndinë: “Çfarë ke nevojë të bësh në marrëdhënien time me Jezusin që të jem gati ta takoj Atë personalisht kur Ai të vijë?” Hapeni zemrën tuaj për gjithçka që Perëndia dëshiron të bëjë në ju. Nëse Ai ju nxit për të bërë diçka, hidheni atë hap në marrëdhënien tuaj me Të. Lexoni Veprat 1:12–14 për tu përgatitur për nesër.

TË ÇLIRUAR!

DITA 4 — Të Mblidhemi së Bashku Me Përrulësi në Mendjen e Krishtit
Veprat 1:12–14

KOHA PERSONALE ME PERËNDINË

Lutje

Eksploroni Biblën

1. Lexoni Veprat 1:12–14. Në listën e atyre që ishin në sallën e sipërme, kush ju habit më shumë? Pse?
2. Lexoni Romakëve 3:23. Çfarë thirrje na bën kjo e vërtetë të gjithëve që të kemi përrulësi në mënyrën se si e shohim njëri-tjetrit?

Mendime nga Ellen White:

Ndërsa dishepujt prisnin përmbushjen e premtimit, ata i përrulën zemrat e tyre në pendim të vërtetë dhe rrëfyen mosbesimin e tyre. Teksa sillnin ndër mend fjalët që Krishti u kishte thënë para vdekjes së Tij, ata e kuptuan më plotësisht domethënien e tyre. Të vërteta që i kishin harruar, i sollën sërish ndër mend dhe ia përsërisnin njëri-tjetrit. Ata e qortonin veten për keqkuptimin e tyre ndaj Shpëtimtarit. Si në një ekran, skenë pas skene, jeta e Tij e mrekullueshme kalonte para tyre. Teksa meditonin mbi jetën e Tij të pastër e të shenjtë, ata ndienin se asnjë mundim nuk do të ishte shumë i vështirë, asnjë sakrificë shumë e madhe, mjafton që të mund të dëshmonin me jetët e tyre bukurinë e karakterit të Krishtit. Oh, sikur të ktheheshin edhe një herë tre vitet e fundit për t’i jetuar përsëri, mendonin ata, sa ndryshe do të vepronin! Sikur të mund ta shihnin Mësuesin përsëri, sa me zell do të përpiqeshin t’i tregonin sa shumë e donin dhe sa singërisht ishin penduar që ndonjëherë e kishin hidhëruar me ndonjë fjalë apo me ndonjë vepër mosbesimi! Por ata u ngushëlluan nga mendimi se ishin falur. Dhe vendosën që, aq sa ishte e mundur, ta shlyenin mosbesimin e tyre duke rrëfyer me guxim për Jezusin përpara botës. (Veprat e Apostujve, fq. 36)

Fokus Lutjeje

Lutuni që asgjë të mos ju pengojë në mënyrën se si i vlerësoni dhe i çmoni familjen, miqtë dhe familjen tuaj të kishës.

RRETHI I FAMILJES/MIQVE**Aktivitet**

Me familjen/miq të tuaj, formoni një rreth me shpinë nga njëri-tjetri. Pyesni: “Në këtë rreth, cilat gjëra na afrojnë më shumë me njëri-tjetrin?” Merrni një përgjigje nga secili person në rreth. Sapo të përgjigjen, ftojini të kthehen përballë rrethit, derisa të gjithë të jenë përballë njëri-tjetrit.

Lutje për Frymën e Shenjtë**Eksploroni Biblën**

Lexoni Filipianëve 2:5–8. Çfarë do të thotë të kesh mendjen dhe qëndrimin e Krishtit? Si duhet të ndikojë kjo në mënyrën se si e trajtojmë njëri-tjetrin në rrethin tonë të familjes dhe të miqve?

Mendime nga Ellen White:

Këto ditë përgatitjeje ishin ditë kërkimi të thellë të zemrës. Dishepujt e ndjenin nevojën e tyre shpirtërore dhe i thërrisnin Zotit për vajtjen e shenjtë që do t'i aftësonte për veprën e shpëtimit të shpirtave. Ata nuk kërkonin një bekim vetëm për veten e tyre. Ata ishin të rënduar me barrën e shpëtimit të shpirtave. Ata e kuptonin se ungjilli duhej t'i çohet botës dhe ata kërkonin fuqinë që Krishti kishte premtuar. (Veprat e Apostujve, fq. 37)

Fokus Lutjeje

Lutuni për mendjen dhe qëndrimin e Jezus Krishtit. Lutuni që të keni përlësinë e Jezusit në bashkëveprimin me çdo person në rrethin tuaj të familjes dhe të miqve.

FAMILJA E KISHËS**Mirëseardhje****Adhurim përmes Lutjes**

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonit.

Falenderim:

1. **(GRUPET E VOGLA)** Lexoni Mateu 11:28, 29. Lutuni me lutje falenderimi për të pasur zemrën e butë dhe të përlur të Jezusit.
2. **(TË GJITHË)** Këndoni një këngë falenderimi.

Pendim:

1. **(GRUPET E VOGLA)** Lexoni Mateu 11:29, që thotë se Jezusi është i përulur nga zemra. Lutuni që përulësia e Jezusit të përballet me krenarinë e zemrës suaj. Rrëfeni krenarinë tuaj dhe kërkonti zemrën e Jezusit.
2. **(TË GJITHË)** Këndoni një këngë pendimi.

Kërkesa:

1. **(GRUPET E VOGLA)** Lexoni Mateu 11:30, ku Jezusi dëshmon se zgjedha e Tij është e butë dhe barra e tij është e lehtë. Është fuqia e Frymës së Shenjtë ajo që e bën zgjedhën e Jezusit të lehtë për secilin prej nesh. Kërkonti Frymën e Shenjtë që të bekojë Fjalën e Perëndisë dhe t'i japë çlodhjen e Tij çdo personi.
2. **(TË GJITHË)** Këndoni një këngë për Frymën e Shenjtë.

Dëshmi**(GRUPET E VOGLA)**

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Pyeteni Perëndinë: “Çfarë ke nevojë të bësh në marrëdhënien time me Jezusin që të jem gati ta takoj Atë personalisht kur Ai të vijë?” Hapeni zemrën tuaj për gjithçka që Perëndia dëshiron të bëjë në ju. Nëse Ai ju nxit për të bërë diçka, hidheni atë hap në marrëdhënien tuaj me Të. Lexoni Veprat 1:12–14 për tu përgatitur për sot.)

Aktivitet

DREJTUESI U THOTË TË GJITHËVE: Qëndroni në rreth me grupet tuaja të vogla. Kërkojini secilit person në grup të ndajë ilustrimin më të mirë që i vjen në mendje për fjalën “UNITET”.

Adhurim përmes Biblës**(GRUPET E VOGLA)**

1. Lexoni Veprat 1:12–14. Cilët persona të listuar në dhomën e sipërme mund të kishin shkaktuar dyshime dhe shqetësime? Pse?
2. Lexoni Gjoni 17:20–23. Çfarë po i kërkonte Jezusi Perëndisë At të bënte për të gjithë ne si ndjekës të Tij?
3. Lexoni Efesianëve 4:30–32. Në çfarë mase duhet ta falim njëri-tjetrin?

Mendime nga Ellen White:

Dishepujt u lutën me përkushtim të madh për një përshtatshmëri për t'u përballur me njerëzit dhe që, në bashkëveprimin e tyre të përditshëm, të flisnin fjalë që do t'i çonin mëkatarët tek Krishti. Duke hequr

mënjatë të gjitha dallimet, çdo dëshirë për epërsi, ata u afruan shumë pranë njëri-tjetrit në bashkësi të krishterë. (Veprat e Apostujve, fq. 37)

Fokus Lutjeje

DREJTUESI U THOTË TË GJITHËVE: Me grupin tuaj të vogël, lutuni për të patur përlësinë e Jezusit në mënyrën se si e shohim dhe e trajtojmë njëri-tjetrin.

Thirrje

DREJTUESI U THOTË TË GJITHËVE: Kush këtu sonte ka nevojë për zemrën e Jezusit për të falur dhe për të gjetur unitet të plotë me të gjithë në këtë kishë? Ju ftoj të dilni përpara ndërsa lutemi që Perëndia të bëjë mrekulli në zemrat tona.

Sfida 24-Orëshe

Pyeteni Perëndinë se cili person në jetën tuaj ka më shumë nevojë për dashurinë, mirësinë, respektin ose faljen tuaj. Ndiqni udhëheqjen e Frymës së Shenjtë duke iu afruar atij personi. Lexoni Veprat 1:4, 5 për tu përgatitur për nesër.

DITA 5 — Pendohuni dhe Mbushuni Plotësisht me Frymën e Shenjtë
Veprat 1:4, 5; 2:1–4; 2:37–39; 3:19

KOHA PERSONALE ME PERËNDINË

Lutje

Eksploroni Biblën

1. Lexoni Veprat 1:4, 5. Çfarë u premtoi Jezusi dishepujve të Tij nëse ata do të prisnin?
2. Lexoni Luka 11:11–13. Sa shumë dëshiron Perëndia që ju ta keni Frymën e Shenjtë?

Mendime nga Ellen White:

Sa fuqishëm mund të veprojë Perëndia kur njerëzit i dorëzohen kontrollit të Frymës së Tij! Premtimi i Frymës së Shenjtë nuk është i kufizuar për asnjë moshë apo për asnjë racë. Krishti deklaroi se ndikimi hyjnor i Frymës së Tij do të ishte me ndjekësit e Tij deri në fund. Nga Dita e Rrëshajëve deri në kohën e tanishme, Ngushëlluesi u është dërguar të gjithë atyre që i janë dorëzuar plotësisht Zotit dhe shërbesës së Tij. Të gjithë atyre që e kanë pranuar Krishtin si Shpëtimtar personal, Fryma e Shenjtë u ka ardhur si këshillues, shenjtërues, udhërrëfyes dhe dëshmitar. Sa më afër që besimtarët kanë ecur me Perëndinë, aq më qartë dhe më fuqishëm kanë dëshmuar për dashurinë e Shpenguesit të tyre dhe për hirin e Tij shpëtues. Burrat dhe gratë që, gjatë shekujve të gjatë të përndjekjes dhe sprovës, kanë gëzuar një masë të madhe të pranisë së Frymës në jetën e tyre, kanë qëndruar si shenja dhe mrekulli në botë. Para engjëjve dhe njerëzve ata kanë zbuluar fuqinë transformuese të dashurisë shpenguese. (Veprat e Apostujve, fq. 49)

Fokus Lutjeje

Lutuni që Perëndia t'ju japë dhuratën e Frymës së Shenjtë përtej gjithçkaje që keni marrë ndonjëherë më parë.

RRETHI I FAMILJES/MIQVE

Aktivitet

Kërkojini secilit person të përshkruajë një dhuratë të paharrueshme që ka marrë nga një anëtar i familjes ose nga një mik dhe të thotë pse ka qënë një dhuratë e veçantë për të. Çfarë mendoni se Perëndia dëshiron t'ju japë?

Lutje për Frymën e Shenjtë

Eksploroni Biblën

Lexoni Luka 11:13 dhe Mateu 7:7, 8. Çfarë na fton Jezusi të bëjmë?

Mendime nga Ellen White:

Kalimi i kohës nuk ka sjellë asnjë ndryshim në premtimin e fundit të Krishtit për të dërguar Frymën e Shenjtë si përfaqësuesin e Tij. Nuk është për shkak të ndonjë kufizimi nga ana e Perëndisë që pasuritë e hirit të Tij nuk rrjedhin drejt njerëzve në tokë. Nëse përmbushja e premtimit nuk shihet ashtu siç duhet, kjo ndodh sepse premtimi nuk vlerësohet siç duhet. Sikur të gjithë të ishin të gatshëm, të gjithë do të mbusheshin me Frymën. Kudo ku nevoja për Frymën e Shenjtë mendohet pak, shihet thatësi shpirtërore, errësi shpirtërore, rënie shpirtërore dhe vdekje. Sa herë që çështjet dytësore zënë vëmendjen, fuqia hyjnore që është e domosdoshme për rritjen dhe begatinë e kishës, dhe që do të sillte me vete të gjitha bekimet e tjera, mungon, edhe pse ofrohet në bollëk të pafund. (Veprat e Apostujve, fq. 50)

Fokus Lutjeje

Lutuni së bashku që Perëndia t'ia dërgojë Dhuratën e Frymës së Shenjtë çdo anëtar të familjes dhe miku në rrethin tuaj.

FAMILJA E KISHËS

Mirëseardhje

Adhurim përmes Lutjes

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonin.

Falenderim:

1. **(GRUPET E VOGLA)** Lexoni Jakobi 1:17. Jepini Perëndisë lutje falenderimi pasi Ai është Dhënësi i çdo dhurate të mirë. Falenderoni Perëndinë për dhuratat që ju mbushin zemrën me mirënjohje!
2. **(TË GJITHË)** Këndoni një këngë falenderimi.

Pendim:

1. **(GRUPET E VOGLA)** Lexoni Jakobi 1:21. Kërkojini Perëndisë t’ju japë përlësinë dhe fuqinë për t’u kthyer nga çdo ligësi.
2. **(TË GJITHË)** Këndoni një këngë pendimi.

Kërkesa:

1. **(GRUPET E VOGLA)** Lexoni Luka 11:13 dhe Jakobi 1:22. Kërkojini Perëndisë ta derdhë Frymën e Tij mbi Fjalën e Tij dhe mbi jetët tona. Kërkoni një zemër bindjeje për ta ndjekur Atë.
2. **(TË GJITHË)** Këndoni një këngë për Frymën e Shenjtë.

Dëshmi**(GRUPET E VOGLA)**

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Pyeteni Perëndinë se cili person në jetën tuaj ka më shumë nevojë për dashurinë, mirësinë, respektin ose faljen tuaj. Ndiqni udhëheqjen e Frymës së Shenjtë duke iu afruar atij personi. Lexoni Veprat 1:4, 5 për tu përgatitur për sot.)

Aktivitet

DREJTUESI U THOTË TË GJITHËVE: Në grupet tuaja të vogla, kërkojini secilit person të përshkruajë shkurtimisht një rast kur pa diçka të “mbushej” plotësisht nga diçka tjetër. Sot do të lutemi që të jemi plotësisht të mbushur me Frymën e Shenjtë.

Adhurim përmes Biblës**(GRUPET E VOGLA)**

1. Lexoni Veprat 1:4, 5. Çfarë fjale përdor Jezusi për të premtuar ardhjen e Frymës së Shenjtë?
2. Lexoni Veprat 2:1–4. Çfarë fjalësh përdoren në këtë pjesë për të përshkruar zbritjen e Frymës së Shenjtë në ditën e Rrëshajëve?
3. Lexoni Veprat 2:37–39. Çfarë është gjëja thelbësore për të pasur plotësinë e Frymës së Shenjtë?

Mendime nga Ellen White:

Meqenëse kjo është mënyra me të cilën ne duhet të marrim fuqi, pse nuk kemi uri dhe etje për dhuratën e Frymës? Pse nuk flasim për Të, nuk lutemi për Të dhe nuk predikojmë për Të? Zoti është më i gatshëm t’ua japë Frymën e Shenjtë atyre që i shërbejnë Atij sesa prindërit janë të gatshëm t’u japin

dhurata të mira fëmijëve të tyre. Për pagëzimin e përditshëm të Frymës, çdo punëtor duhet t'ia drejtojë kërkesën e tij Perëndisë. Grupe punëtorësh të krishterë duhet të mblidhen për të kërkuar ndihmë të veçantë, për urtësi qiellore, që të dinë si të planifikojnë dhe të veprojnë me mençuri. Veçanërisht duhet të lutën që Perëndia t'i pagëzojë ambasadorët e Tij të zgjedhur në fushat misionare me një masë të pasur të Frymës së Tij. Prania e Frymës në punëtorët e Perëndisë do t'i japë shpalljes së të vërtetës një fuqi që as gjithë nderi apo lavdia e botës nuk mund ta japë. (Veprat e Apostujve, fq. 50, 51)

Nuk është dëshmi përfundimtare që një njeri është i krishterë kur ai shfaq ekstazë shpirtërore në rrethana të jashtëzakonshme. Shenjtëria nuk është rrëmbim: ajo është një dorëzim i plotë i vullnetit ndaj Perëndisë; është të jetosh sipas çdo fjale që del nga goja e Perëndisë; është të bësh vullnetin e Atit tonë qiellor; është t'i besosh Perëndisë në sprovë, në errësirë ashtu si edhe në dritë; është të ecësh me besim dhe jo me shikim; është të mbështetesh te Perëndia me besim të pakushtëzuar dhe të pushosh në dashurinë e Tij. (Veprat e Apostujve, fq. 51)

Fokus Lutjeje

DREJTUESI U THOTË TË GJITHËVE: Lutuni në dyshe ose treshe që Fryma e Shenjtë të na fuqizojë të pendohemi plotësisht për gjithçka që pengon lidhjen tonë me Perëndinë.

Thirrje

DREJTUESI U THOTË TË GJITHËVE: Cili prej jush këtu sonte dëshiron të jetë plotësisht i mbushur me Frymën e Shenjtë? Ju ftoj të vini dhe të bashkoheni me mua ndërsa përulemi dhe lutemi për pagëzimin e plotë të Frymës së Shenjtë.

Sfida 24-Orëshe

UDHËHEQËSI PËR TË GJITHË: Lutuni çdo ditë për të marrë pagëzimin e freskët të Frymës së Shenjtë. Nëse është e mundur, gjunjëzohuni sot dhe kërkojani Perëndisë këtë Dhuratë të çmuar! Pendohuni për gjithçka që Fryma e Shenjtë ju bind të lini pas. Lexoni Veprat 2:14 dhe 4:1–31 për tu përgatitur për nesër.

TË ÇLIRUAR!

DITA 6 —Tregohuni të Guximshëm për Krishtin dhe Ndiqeni Atë Plotësisht
Veprat 2:14; 4:1–31

KOHA PERSONALE ME PERËNDINË

Lutje

Eksploroni Biblën

Lexoni Veprat 1:13; 2:1–5, 11. A ishte Pjetri në sallën e sipërme? Çfarë bëri Fryma e Shenjtë përmes tij dhe përmes të tjerëve në sallë në ditën e Rrëshajëve?

Mendime nga Ellen White:

Kjo skenë është plot interes. Shikoni njerëzit që vijnë nga të gjitha drejtimet për të dëgjuar dishepujt që dëshmojnë për të vërtetën e Jezusit. Ata grumbullohen dhe mbushin tempullin. Priftërinjtë dhe sundimtarët janë aty, me vështirimin e errët të ligësisë ende në fytyrat e tyre, me zemrat ende të mbushura me urrejtje të vazhdueshme kundër Krishtit, me duart ende të papastruara nga gjaku i derdhur kur kryqëzuan Shpenguesin e botës. Ata kishin menduar se do t'i gjenin apostujt të frikësuar nën dorën e fortë të shtypjes dhe vrasjes, por i gjetën të ngritur mbi çdo frikë dhe të mbushur me Frymën e Shenjtë, duke shpallur me fuqi hyjninë e Jezusit të Nazaretit. Ata i dëgjuan duke deklaruar me guxim se Ai që pak kohë më parë ishte poshtëruar, tallur, goditur nga duar mizore dhe kryqëzuar, është Princi i jetës, tani i lartësuar në të djathtën e Perëndisë. (Veprat e Apostujve, fq. 42)

Fokus Lutjeje

Lutuni për të patur guxim të shenjtë që të jeni ata që Fryma e Shenjtë ju ka thirrur të jeni!

RRETHI I FAMILJES/MIQVE

Aktivitet Lidhës

Pyetni familjen/miqtë tuaj: “Kur dhe ku ndiheni më të sigurt për të folur?” Jepini secilit mundësinë të shprehë mendimin. Sot do të eksplorojmë vetëbesimin e udhëhequr nga Fryma e Shenjtë.

Lutje për Frymën e Shenjtë

Eksploroni Biblën

Lexoni Veprat 2:14. Duke pasur parasysh se Pjetri kishte deklaruar publikisht se nuk e njohte Jezusin rreth shtatë javë para Rrëshajëve, çfarë hapash befasues mori ai kur u mbush me Frymën e Shenjtë?

Mendime nga Ellen White:

Ata mund ta përmendnin emrin e Jezusit me siguri; sepse a nuk ishte Ai Miku i tyre dhe Vëllai i tyre i Madh? Të sjellë në bashkësi të ngushtë me Krishtin, ata uleshin me Të në vendet qiellore. Me çfarë gjuhe të zjarrtë i veshën idetë e tyre ndërsa dëshmonin për Të! Zemrat e tyre ishin të mbushura me një mirësi kaq të plotë, kaq të thellë, kaq gjithëpërfshirëse, saqë i shtynte të shkonin deri në skajet e tokës, duke dëshmuar për fuqinë e Krishtit. Ata ishin të mbushur me një dëshirë të zjarrtë për të çuar përpara veprën që Ai kishte filluar. Ata e kuptonin madhësitinë e borxhit të tyre ndaj qiellit dhe përgjegjësinë e punës së tyre. Të fuqizuar nga dhurimi i Frymës së Shenjtë, ata dolën përpara të mbushur me zell për të zgjeruar triumfet e kryqit. Fryma i gjallëronte dhe fliste përmes tyre. Paqja e Krishtit shkëlqente në fytyrat e tyre. Ata ia kishin kushtuar jetën Atij për shërbim, dhe vetë tiparet e tyre jepnin dëshmi për dorëzimin që kishin bërë. (Veprat e Apostujve, fq. 46)

Fokus Lutjeje

Lutuni që Fryma e Shenjtë ta çlirojë çdo person në rrethin tuaj familjar dhe shoqëror që të mund të ndajë lajmin e mirë të Jezusit me këdo.

FAMILJA E KISHËS**Mirëseardhje****Adhurim në Lutje**

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonini.

Lavdërim:

1. **(GRUPET E VOGLA)** Zbulesa 1 është e mbushur me shumë emra për Jezusin. Lavdëroni Jezusin për një nga emrat e Tij të gjetur në këtë kapitull.
2. **(TË GJITHË)** Këndoni një këngë lavdërimi.

Rrëfim:

1. **(GRUPET E VOGLA)** Lexoni Zbulesa 1:5 (pjesa e fundit). Ftoni anëtarët e grupit të kalojnë kohë individuale duke rrëfyer mëkatet e tyre. Gjeni faljen tuaj në Jezusin, Atë “që na do dhe na çliroi nga mëkatet tona me gjakun e Tij”.
2. **(TË GJITHË)** Këndoni një këngë rrëfimi.

Kërkesa:

1. **(GRUPET E VOGLA)** Kërkojini Perëndisë At, në emrin e Jezusit, i cili është “i gjallë përjetë” (Zbulesa 1:18), të dërgojë Frymën e Shenjtë për të bekuar Fjalën e Tij.
2. **(TË GJITHË)** Këndoni një këngë për Frymën e Shenjtë.

Dëshmi**(GRUPET E VOGLA)**

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Lutuni çdo ditë për të marrë pagëzimin e freskët të Frymës së Shenjtë. Nëse është e mundur, gjuhëzohuni sot dhe kërkojini Perëndisë këtë Dhuratë të çmuar! Pendohuni për gjithçka që Fryma e Shenjtë ju bind të lini pas. Lexoni Veprat 2:14 dhe 4:1–31 për tu përgatitur për sot).

Aktivitet

DREJTUESI U THOTË TË GJITHËVE: A do të mundeshit të ngriheshit në këmbë të vetëm në një dhomë plot me njerëz NËSE—

(ngrihuni në këmbë nëse pohimi është PO për ju)

- të gjithëve që ngrihen në këmbë do t’u jepej një biletë falas avioni për kudo në botë
- personit të parë që ngrihet në këmbë do t’i jepej 1,000 dollarë

• personit të parë që ngrihet në këmbë do t'i jepej tre minuta për të thënë çfarëdo gjëje para të gjithëve në dhomë

Sot le të eksplorojmë çfarë thotë Fjala e Perëndisë për rrezikimin e gjithçkaje që kemi për tu ngritur në këmbë për Jezus Krishtin.

Adhurim përmes Biblës

(GRUPET E VOGLA)

1. Lexoni Veprat 4:1–13. Cilat janë dy arsye pse Pjetri ishte kaq i patrembur për Krishtin? (Vini re Veprat 4:8, 13.)
2. Lexoni Veprat 4:21–31. Për çfarë u lutën besimtarët?

Mendime nga Ellen White:

Ata që ishin të pranishëm dhe që mbanin mend rolin që kishte luajtur Pjetri në gjyqin e Mësuesit të tij, e përkëdhelnin veten me mendimin se tani ai mund të frikësohej nga kërcënimi i burgimit dhe i vdekjes. Por Pjetri që mohoi Krishtin në orën e nevojës së Tij më të madhe ishte impulsiv dhe vetëbesues, shumë i ndryshëm nga Pjetri që u soll para Sinedrit për hetim. Që nga rënia e tij, ai ishte konvertuar. Nuk ishte më krenar dhe mburravec, por i përlulur dhe mosbesues ndaj vetes. Ai ishte i mbushur me Frymën e Shenjtë, dhe me ndihmën e kësaj fuqie ishte i vendosur të hiqte njollën e mohimit të tij duke nderuar emrin që dikur e kishte mohuar. (Veprat e Apostujve, fq. 62, 63)

Fokus Lutjeje

DREJTUESI U THOTË TË GJITHËVE: Në grupin tuaj të vogël, lutuni që Fryma e Shenjtë ta ndihmojë çdo person në grupin tuaj të flasë Fjalën e Perëndisë me guxim të shenjtë dhe me dashurinë e madhe të Perëndisë.

Thirrje

DREJTUESI U THOTË TË GJITHËVE: Cili prej jush këtu sonte është i bindur se frika është ajo që na pengon në ndarjen e lajmit të mirë të Jezusit me familjen, miqtë, shokët e shkollës, fqinjët, kolegët e punës ose të panjohurit? Ejani dhe bashkohuni me mua në lutje për guximin e shenjtë të Frymës së Shenjtë për të ndarë Jezusin kudo, në çdo kohë, me çdo kosto.

Sfida 24-Orëshe

DREJTUESI U THOTË TË GJITHËVE:

Kërkojini Perëndisë guximin e Krishtit për të ndarë me të tjerët atë që Ai po bën në jetën tuaj. Lutuni. Kërkojini Perëndisë t'ju udhëheqë me Frymën e Shenjtë te dikush që ka nevojë të dëgjojë historinë tuaj personale për atë që Jezusi po bën në jetën tuaj. Ndajeni Jezusin me atë person! Për tu përgatitur për nesër, lexoni Veprat 2:17, 18; 4:24–31.

DITA 7 — Dishepulloni Fëmijët dhe të Gjitha Brezat për të Folur për Jezusin
Veprat 2:17, 18

KOHA PERSONALE ME PERËNDINË**Lutje****Eksploroni Biblën**

Lexoni Joeli 2:28, 29. Çfarë u profetizua në këtë pasazh në lidhje me derdhjen e Frymës së Shenjtë?

Mendime nga Ellen White:

Qëllimi i Perëndisë për fëmijët që rriten pranë vatrave tona është më i gjerë, më i thellë dhe më i lartë sesa vizioni ynë i kufizuar mund ta kuptojë. Nga pozitat më të përulura, ata që Ai i ka parë besnikë në të kaluarën janë thirrur me kalimin e kohës të dëshmojnë për Të në vendet më të larta të botës. Dhe shumë djem të sotëm, që rriten ashtu si Danieli në shtëpinë e tij judease, duke studiuar Fjalën e Perëndisë dhe veprat e Tij, dhe duke mësuar mësimet e shërbimit besnik, do të qëndrojnë një ditë në asamble legjislative, në salla drejtësie ose në oborre mbretërore si dëshmitarë për Mbretin e mbretërve. Shumë do të thirren në një shërbesë më të gjerë. E gjithë bota po përgatitet për ungjillin. . . . Nga çdo cep i kësaj bote vjen klithma e zemrave të goditura nga mëkati për njohjen e Perëndisë së dashurisë. . . . Varet nga ne që kemi marrë njohurinë, dhe nga fëmijët tanë të cilëve mund t'ua përcjellim atë, t'i përgjigjemi kësaj thirrjeje. Çdo shtëpie dhe çdo shkolle, çdo prindi, mësuesi dhe fëmijë mbi të cilët ka ndriçuar drita e ungjillit, në këtë krizë u drejtohet pyetja që iu bë mbretëreshës Ester në atë moment vendimtar në historinë e Izraelit: “Kush e di nëse është pikërisht për një kohë të tillë që ti ke arritur në pozitë mbretërore?” (Shtëpia Adventiste, fq. 484)

Fokus Lutjeje

Lutuni që Perëndia ta bëjë jetën tuaj një përmbushje të kësaj profecie të lashtë.

RRETHI I FAMILJES/MIQVE**Aktivitet**

Shikoni rrethin tuaj të familjes/miqve. Le të emërojnë secili një hobi ose aftësi që do të donte ta mësonte nga dikush në rreth. Ashtu siç ua përcjellim talentet familjes dhe miqve tanë, mund t'ua përcjellim edhe besimin, guximin dhe frymën misionare.

Lutje për Frymën e Shenjtë**Eksploroni Biblën**

Lexoni Veprat 2:17, 18 dhe Malakia 4:5, 6. Si e përgatit mesazhi të Malakia zemrën e familjeve për të qenë pjesë e profecisë së ditëve të fundit të përshkruar në Veprat 2:17, 18?

Mendime nga Ellen White:

Prindërit duhet, në një kuptim të veçantë, ta shohin veten si agjentë të Perëndisë për të mësuar fëmijët e tyre, ashtu siç bëri Abrahami, që të ecin në rrugën e Zotit. Ata duhet të kërkojnë me zell Shkrimet, për të njohur se cila është rruga e Zotit, që t'ua mësojnë atë familjes së tyre. Mikea thotë: “Çfarë kërkon Zoti prej teje, veçse të veprosh me drejtësi, të duash mëshirën dhe të ecësh me përvetësi me Perëndinë tënd?” [Mikea 6:8.] Që të jenë mësues, prindërit duhet të jenë nxënës, duke mbledhur vazhdimisht dritë nga orakujt e Perëndisë dhe, me mësim dhe shembull, duhet ta sjellin këtë dritë të çmuar në edukimin e fëmijëve të tyre.

Nga drita që Perëndia më ka dhënë, e di se burri dhe gruaja duhet të jenë në shtëpi shërbëtorë, mjekë, infermierë dhe mësues, duke i lidhur fëmijët e tyre me veten dhe me Perëndinë, duke i trajnuar të shmangin çdo zakon që në çfarëdo mënyre do të dëmtonte veprën e Perëndisë në trup, dhe duke i mësuar të kujdesen për çdo pjesë të organizmit të gjallë. (Shtëpia Adventiste, fq. 184)

Fokus Lutjeje

Kërkojini Perëndisë t'ju mbushë me dashuri shtesë dhe ta kthejë zemrën tuaj drejt çdo anëtari të familjes me të cilin keni nevojë për shërim.

FAMILJA E KISHËS

Mirëseardhje

Adhurim përmes Lutjes

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Lavdërim:

1. **(GRUPET E VOGLA)** Lexoni Joeli 2:1. Lavdëroni Perëndinë për ardhjen e dytë të Jezusit, që në këtë varg quhet “dita e Zotit”. Jezusi po vjen përsëri!
2. **(TË GJITHË)** Këndoni një këngë lavdërimi.

Pendim:

1. **(GRUPET E VOGLA)** Lexoni Joeli 2:12, 13. Lutjuni Perëndisë që ta kthejë plotësisht zemrën tuaj drejt Tij.
2. **(TË GJITHË)** Këndoni një këngë pendimi.

Kërkesa:

1. **(GRUPET E VOGLA)** Lexoni Joeli 2:15–17. Kërkojini Perëndisë të dërgojë Frymën e Shenjtë për të mbledhur të gjitha brezat te Biri i Tij, Jezus Krishti, ndërsa ka ende kohë.
2. **(TË GJITHË)** Këndoni një këngë për Frymën e Shenjtë.

Dëshmi**(GRUPET E VOGLA)**

Formoni grupe me dy ose tre persona brenda grupeve tuaja të vogla. Pyetni dhe përgjigjuni: “Çfarë ju ndihmoi Perëndia të bënit me Sfidën e Djeshme 24-Orëshe?”

(Sfida e djeshme 24-Orëshe: Kërkojini Perëndisë guximin e Krishtit për të ndarë me të tjerët atë që Ai po bën në jetën tuaj. Lutuni. Kërkojini Perëndisë t’ju udhëheqë me Frymën e Shenjtë të dikush që ka nevojë të dëgjojë historinë tuaj personale për atë që Jezusi po bën në jetën tuaj. Ndajeni Jezusin me atë person! Për tu përgatitur për sot, lexoni Veprat 2:17, 18; 4:24–31.)

Aktivitet

DREJTUESI U THOTË TË GJITHËVE: Formoni grupe me dy ose tre persona. Tregoni në grup për dikë që ju ka mentoruar të besoni, të ndiqni dhe të ndani Jezusin me të tjerët kur ishit fëmijë ose të rinj. Si mund të jemi ne ai lloj mentori për dikë tjetër?

Adhurim përmes Biblës**(GRUPET E VOGLA)**

1. Lexoni Veprat 2:17, 18. Kur duhet të përmbushet kjo profeci? Çfarë do të bëjë çdo brez ndërsa mbushet me Frymën e Shenjtë?
2. Lexoni Ligji i Përtërirë 6:4–7. Si i përgatit plani i Perëndisë, në këtë pasazh, fëmijët dhe të rinjtë për të bërë pjesën e tyre në profecinë e Veprave 2:17, 18 për ditët e fundit?

Mendime nga Ellen White:

Në urtësinë e Tij, Zoti ka vendosur që familja të jetë agjencia më e madhe arsimore nga të gjitha. Shtëpia është vendi ku duhet të fillojë edukimi i fëmijës. Në shtëpi është shkolla e tij e parë. Atje, me prindërit si mësues, ai duhet të mësojë mësimet që do ta udhëheqin gjatë gjithë jetës, mësimet respekti, bindjeje, nderimi, vetëkontrolli. Ndikimet arsimore të shtëpisë janë një fuqi e vendosur për të mirë ose për të keq. Ato janë në shumë aspekte të heshtura dhe graduale, por nëse ushtrohen në mënyrën e duhur, bëhen një fuqi me ndikim të gjerë për të vërtetën dhe drejtësinë. Nëse fëmija nuk udhëzohet siç duhet në shtëpi, Satani do ta edukojë atë përmes agjencive sipas zgjedhjes së tij. Sa e rëndësishme, pra, është shkolla në shtëpi! Shikojeni rrethin familjar si një shkollë trajnimi, ku po përgatitni fëmijët tuaj për kryerjen e detyrave të tyre në shtëpi, në shoqëri dhe në kishë. (Shtëpia Adventiste, fq. 182)

Fokus Lutjeje

DREJTUESI U THOTË TË GJITHËVE: Lutuni së bashku në grupet tuaja të vogla që:

1. Prindërit të mentorojnë me qëllim fëmijët dhe të rinjtë në shtëpitë e tyre për të besuar, për të ndjekur dhe për të ndarë Jezusin me të tjerët.
2. Të rinjtë dhe të moshuarit të bashkëpunojnë në ndarjen e Jezusit në komunitetin e tyre dhe në mbarë botën.

Thirrje

DREJTUESI U THOTË TË GJITHËVE: Kush nga ju këtu sonte është i bindur se duhet të investojë kohën dhe energjinë e tij në mentorimin e të rinjve për të besuar, për të ndjekur dhe për të ndarë Jezusin me fuqinë e Frymës së Shenjtë? Ju lutem ejani dhe bashkohuni me mua për lutje.

Sfida 24-Orëshe

DREJTUESI U THOTË TË GJITHËVE: Kërkojini Perëndisë t’ju tregojë si të inkurajoni dhe se si të përforconi më së miri rrugëtimin e besimit të fëmijëve tuaj ose të atyre në rrethin tuaj familjar/shoqëror. Para takimit të nesërm, veproni menjëherë sipas idesë që Perëndia ju jep për t’u afruar me njërin prej këtyre fëmijëve. Lexoni Veprat 2:41–47 për përgatitjen për nesër.

TË ÇLIRUAR!

DITA 8 — Të Duam Familjen Tonë të Besimit siç Jezusi Do
Veprat 2:41–47

KOHË PERSONALE ME PERËNDINË**Lutje****Eksploro Biblën**

Lexo **Veprat 2:41**. Si mund ta ketë sfiduar kjo shtesë e madhe në kishën e hershme dashurinë e besimtarëve të hershëm?

Mendime nga Ellen White:

Kur hiri i Krishtit shprehet në fjalët dhe veprat e besimtarëve, drita ndriçon tek ata që janë në errësirë. Ndërsa gojë luten për lavdinë e Zotit, duart shtrihen për të ndihmuar të humburit. Në ditën e Pentekostit, kur Fryma e Shenjtë zbriti, askush nuk pretendonte pronësi personale; gjithçka mbahej për përparimin e reformës së mrekullueshme. Mijëra u konvertuan në një ditë të vetme. Kur e njëjta Frymë vepron sot tek besimtarët, dhe kur ata i shërbejnë Perëndisë me bujari, realizohet një punë e gjerë dhe me ndikim të madh. (Manuskripti 95, 1907, par. 17)

Mesazhi i parë i engjëllit te **Zbulesa 14**, që shpall orën e gjykimit të Perëndisë dhe u bën thirrje njerëzve t’i ndruhen dhe t’a adhurojnë Perëndinë, kishte për qëllim të ndante popullin e Zotit nga ndikimet e korruptuara të botës dhe t’i zgjonte ata për të parë gjendjen e tyre të vërtetë shpirtërore. Pranimi i këtij mesazhi do të kishte korrigjuar të këqijat që i largonin ata nga Zoti. Fryma dhe fuqia e Perëndisë do të ishin manifestuar, dhe kisha do të kishte përjetuar përsëri unitetin, besimin dhe dashurinë e ditëve apostolike, kur besimtarët “ishin në një zemër të vetme dhe në një shpirt të vetëm,” “flisnin fjalën e Perëndisë me guxim,” dhe “Zoti shtonte çdo ditë në kishë ata që duhej të shpëtoheshin.” (Lufta e Madhe, f. 379)

Fokus Lutjeje

Lutju Zotit të mbushë zemrën tënde me dashurinë që të nevojitet për tu kujdesur për njerëzit që Ai po i thërret në këtë lëvizje profetike të ditëve të fundit.

RRETHI I FAMILJES/MIQVE

Aktivitet

Sipas radhës tregoni një veprim të një personi nga familja ose nga miqtë tuaj që ju tregon në praktikë sa shumë ju do. Bëjeni vetëm me veprime dhe shikoni nëse të tjerët mund ta gjejnë se çfarë është.

Lutje për Frymën e Shenjtë

Eksploro Biblën

Lexo **Veprat 2:42–44**. Si e transformoi Fryma e Shenjtë mënyrën se si kisha e hershme e donin njëri-tjetrin?

Mendime nga Ellen White:

Besimtarët duhet të ruanin dashurinë që mbushi zemrat e apostujve pas zbritjes së Frymës së Shenjtë. Ata duhet t'i bindeshin urdhrat të ri: “Ta doni njëri-tjetrin, sikurse unë ju kam dashur ju.” (Gjoni 13:34) Ata duhet të ishin aq të bashkuar me Krishtin, sa të kishin mundësi të përmbushnin kërkesat e Tij. Fuqia e një Shpëtimtari që i shpengoi ata me drejtësinë e Tij duhej të shfaqej në mënyrë madhështore. (Dëshmitë për Kishën, vëll. 8, f. 241)

Fokus Lutjeje

Lutju Zotit që Fryma e Shenjtë të ndihmojë çdo person në familjen/miqësinë tuaj të duan njëri-tjetrin me fjalë dhe me vepra.

FAMILJA E KISHËS

Mirëseardhja

Adhurim përmes Lutjes

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Falenderim:

1. **(GRUPET E VOGLA)** Lexoni 1 Gjoni 4:9, 10. Falenderoni Zotin që na zbuloi dashurinë e Tij përmes Jezusit, duke na dhënë jetë!
2. **(TË GJITHË)** Këndoni një këngë falenderimi.

Pendim:

1. **(GRUPET E VOGLA)** Lexoni 1 Gjoni 4:11. Kërkoni falje që nuk e kemi dashur njëri-tjetrin ashtu si Perëndia na ka thirrur ta duam.
2. **(TË GJITHË)** Këndoni një këngë kërkimi faljeje.

Kërkesa:

1. **(GRUPET E VOGLA)** Lexoni 1 Gjoni 4:19. Kërkoni nga Perëndia t'ju ndihmojë t'i doni të tjerët në kishë me fuqinë e Frymës.
2. **(TË GJITHË)** Këndoni një këngë për Frymën e Shenjtë.

Dëshmi:

(GRUPET E VOGLA) Formoni grupe prej 2–3 vetash. Pyetni dhe përgjigjuni: “Çfarë na ndihmoi Zoti të bënim me Sfidën 24-orëshe të djeshme?”

(Sfida: Kërkojini Perëndisë t'ju tregojë se si të inkurajoni dhe se si të përforconi më së miri rrugëtimin e besimit të fëmijëve tuaj ose të atyre në rrethin tuaj familjar/shoqëror. Veproni menjëherë sipas udhëzimit të Tij.)

Aktivitet

Ndahuni në grupe me nga dy ose tre persona. Tregoni një moment ku një anëtar i kishës ka treguar kujdes për ju ose dikë tjetër.

Adhurim përmes Biblës

(GRUPET E VOGLA) Lexoni Veprat 2:41–45. Në çfarë mënyrash besimtarët e shekullit të parë e donin njëri-tjetrin në mënyrë sakrifikuese?

Mendime nga Ellen White:

Pas zbritjes së Frymës së Shenjtë, dishepujt shpallën Krishtin e ngjallur, duke dëshiruar shpëtimin e shpirtave. Ata gëzonin në bashkësinë me besimtarët, ishin të butë, mendjemprehtë, vetë-sakrifikues dhe të gatshëm të bënin çdo sakrificë për hir të së vërtetës. Në bashkëjetesën e tyre të përditshme ata treguan dashurinë e Krishtit përmes fjalëve dhe veprave jo-egoiste, duke ndezur dashurinë tek të tjerët. (Veprat e Apostujve, f. 547)

Fokus Lutjeje

DREJTUESI U THOTË TË GJITHËVE: “Në grupin tuaj të vogël, lutuni që Fryma e Shenjtë të përballët me qëndrimet tona të pakujdesshme ndaj personave që janë në nevojë, në familjen tonë të kishës.”.

Thirrje

DREJTUESI U THOTË TË GJITHËVE: Kush është i gatshëm të lutet që Fryma e Shenjtë të hapë zemrën tuaj për të dashur familjen tuaj të kishës si kurrë më parë? Ejani dhe bashkohuni në lutje.

Sfida 24-orëshe

DREJTUESI U THOTË TË GJITHËVE: Pyetni Zotin se çfarë akt dashurie do të donte Ai që ju të bënit për të plotësuar një nevojë tek një anëtar i familjes së kishës. Tregoni sakrificë për ta kryer këtë akt para takimit të nesërm. Lexoni Veprat 3:1–10 për tu përgatitur për nesër.

TË ÇLIRUAR!

DITA 9 — Trego Vëmendje dhe Kujdes për të Harruarit
Veprat 3:1–10

KOHË PERSONALE ME PERËNDINË**Lutje****Eksploro Biblën**

Lexo **Mateu 25:31–46**. Për kë na sfidon Jezusi të kujdesemi? Si ndikohet Jezusi personalisht nga mënyra se si ne kujdesemi për këta njerëz të harruar?

Mendime nga Ellen White:

Çdo veprim i mirë që bëhet për ta në emër të Jezusit, pranohet prej Tij sikur të ishte bërë për Vetë Atë sepse Ai identifikon interesin e Tij me atë të njerëzimit që vuan. Ai ka besuar kishën e Tij për punën madhështore të shërbimit ndaj Jezusit duke ndihmuar dhe bekuar të varfrit dhe ata që vuajnë. Për të gjithë ata që do t'u shërbejnë me zemra të gatshme, do të qëndrojnë bekimi i Zotit. (Këshilla mbi Administrimin, f. 164)

Fokus Lutjeje

Lutju Zotit për sy që të shohin njerëzit në nevojë sikur të ishin Vetë Jezusi dhe për tu kujdesur për ta sikur të ishte Jezusi.

RRETHI I FAMILJES/MIQVE**Aktivitet**

Ftojini të gjithë të flasin për dikë në komunitetin lokal që ka nevojë në çfarëdo lloj mënyre. Pse nuk i vërejmë të njëjtët njerëz që kanë nevojë të gjithë njësoj?

Lutje për Frymën e Shenjtë**Eksploro Biblën**

Lexo **Veprat 3:1–4**. Pjetri dhe Gjoni kishin shkuar shumë herë në tempull. Kurrë më parë nuk është përmendur që ata ndaluan tek dikush në nevojë. Çfarë i bëri ata të SHIHNIN një person në nevojë këtë herë? (Shiko Veprat 2:4, pjesa e parë)

Mendime nga Ellen White:

Vetëm metoda e Krishtit do të sjellë sukses të vërtetë në arritjen e njerëzve. Shpëtimtari u përzje me njerëzit sikur të dëshironte të mirën e tyre. Ai tregoi simpati, u shërbeu nevojave të tyre dhe fitoi besimin e tyre. Pastaj u tha: “Më ndiqni.” (Shërbimi i Shërimit, f. 143)

Fokus Lutjeje

Lutju Zotit të të japë zemrën e Jezusit për njerëzit e harruar në nevojë.

FAMILJA E KISHËS**Mirëseardhja****Adhurim përmes Lutjes**

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Falenderim:

1. **(GRUPET E VOGLA)** Lexoni Mateu 9:35. Falenderoni Zotin për shërbimin personal të Jezusit për njerëzit, jo vetëm programet.
2. **(TË GJITHË)** Këndoni një këngë falenderimi.

Pendim:

1. **(GRUPET E VOGLA)** Lexoni Mateu 9:36. Kërkoni falje për mungesën tonë të dashurisë për njerëzit. Kërkoni që Zoti të na falë për mosshprehjen e dhembshurisë së Jezusit për njerëzit në nevojë.
2. **(TË GJITHË)** Këndoni një këngë kërkimi faljeje.

Kërkesa:

1. **(GRUPET E VOGLA)** Lexoni Mateu 9:37, 38. Lutuni që Zoti t’ju dërgojë në të korrat e Tij për të kujdesur për njerëzit në nevojë.
2. **(GRUPET E VOGLA)** Këndoni një këngë për Frymën e Shenjtë.

Dëshmi:

(GRUPET E VOGLA) Formoni grupe prej 2–3 vetash. Pyetni dhe përgjigjuni: “Çfarë na ndihmoi Zoti të bënim me Sfidën 24-orëshe të djeshme?”

(Sfida: Pyetni Zotin se çfarë akt dashurie do të donte Ai që ju të bënit për të plotësuar një nevojë tek një anëtar i familjes së kishës. Kryejeni atë para takimit të nesërm.)

Aktivitet

Bashkohuni në grupe prej dy ose tre personash. Tregoni një moment kur një i huaj tregoi dhembshuri dhe ju ndihmoi kur kishit nevojë. Si ndikoi kjo në jetën tuaj atëherë? Lutuni së bashku për Frymën e Shenjtë që të bekojë Fjalën.

Adhurim përmes Fjalës

(GRUPET E VOGLA) Lexoni **Veprat 3:1–10**. Si ndikoi “shikimi” i invalidit që Pjetri dhe Gjoni të kujdeseshin për të?

Mendime nga Ellen White:

Ka nevojë të afrohem me njerëzit përmes përpjekjes personale. Nëse do të harxhohej më pak kohë në predikime dhe më shumë kohë në shërbim personal, do të shiheshin rezultate më të mëdha. Të varfrit të ndihmohen, të sëmurët të ndihen të përkujdesur, të pikëlluarit dhe të humburit të ngushëllohen, të paedukuarit të mësojnë, të paditurit të këshillohen. Duhet të qajmë me ata që qajnë dhe të gëzohemi me ata që gëzohen. Me fuqinë e bindjes, lutjes dhe dashurisë së Perëndisë, kjo punë nuk do të mbetet pa fryt. (Shërbesa e Shërimit, f. 143, 144)

Fokus Lutjeje

DREJTUESI U THOTË TË GJITHËVE: Lutuni në grupet tuaja që t’i shihni njerëzit si i sheh Jezusi. Lutuni që zemra juaj të preket nga dhembshuria kur shihni njerëzit me nevoja të pazgjidhura.

Thirrje

DREJTUESI U THOTË TË GJITHËVE: Kush ka nevojë sonte për zemrën e Jezusit për të harruarit në komunitetin tuaj? Ejani dhe lutuni që Jezusi t’ju japë dhembshurinë e Tij për ata që janë në nevojë.

Sfida 24-orëshe

DREJTUESI U THOTË TË GJITHËVE: Kërkojini Zotit t’ju tregojë dikë të harruar në komunitetin tuaj. Pyetni se çfarë ka nevojë ai person nga ju dhe nga Zoti Jezusi. Shkoni dhe i shërbeni atij në emër të Jezusit para takimit të nesërm. Lexoni Veprat 4:32–37 për tu përgatitur për nesër.

TË ÇLIRUAR!

DITA 10 — Praktiko Bujarinë Radikale
Veprat 4:32–37

KOHË PERSONALE ME ZOTIN

Lutje

Eksploro Biblën

Lexo **Veprat 4:32**. Si do t'i përshkruanit besimtarët në librin e Veprave?

Mendime nga Ellen White:

Kjo bujari nga ana e besimtarëve ishte rezultat i derdhjes së Frymës së Shenjtë. Të konvertuarit për shkak të ungjillit ishin “në një zemër të vetme dhe në një shpirt të vetëm”. Një interes i përbashkët i udhëhiqte ata, suksesi i misionit që u ishte besuar dhe lakmia nuk kishte vend në jetën e tyre. Dashuria e tyre për vëllezërit dhe për kauzën që kishin mbështetur ishte më e madhe se dashuria për para dhe pasuri. Veprat e tyre dëshmonin se ata vlerësonin shpirtin e njeriut më shumë se pasurinë tokësore. (Veprat e Apostujve, fq. 70, 71)

Fokus Lutjeje

Lutju Zotit të të japë një zemër bujare dhe dëshirë për një unitet të vërtetë me besimtarët e tjerë.

RRETHI I FAMILJES/MIQVE

Aktivitet

Mblidhni të gjithë në një rreth. Me radhë performoni shkurtimisht me lëvizje një dhuratë sakrifikuese që dikush ju ka dhuruar. Lutuni që Fryma e Shenjtë të bekojë Fjalën e Tij.

Lutje për Frymën e Shenjtë

Eksploro Biblën

Lexo **Veprat 4:32, 33**. Cila është lidhja midis bujarisë së madhe dhe fuqisë së madhe nga Fryma e Shenjtë?

Mendime nga Ellen White:

Për kishën apostolike, në ato ditë të ndritshme kur lavdia e Krishtit të ringjallur shkëlqente mbi ta, është shkruar se askush nuk tha “se ndonjë nga gjërat që zotëronte ishte e tij.” “As nuk kishte ndonjë njeri që i mungonte diçka.” “Dhe me fuqi të madhe apostujt dëshmonin për ringjalljen e Zotit Jezus, dhe hiri i madh ishte mbi të gjithë ata.” “Dhe ata, vazhduan çdo ditë në një mendje në tempull, dhe duke copëtuar bukën nga shtëpia në shtëpi, ushqeheshin me gëzim dhe zemër të pastër, duke lavdëruar Zotin dhe duke patur hir me të gjithë popullin. Dhe Zoti shtonte çdo ditë në kishë ata që duheshin shpëtuar.” (Veprat 4:32, 34, 33; 2:46, 47)

Kërko në qiell dhe në tokë, dhe nuk ka të vërtetë më të fuqishme se ajo që manifestohet në veprat e mëshirës ndaj atyre që kanë nevojë për simpati dhe ndihmë. Kjo është e vërteta ashtu siç është në Jezusin. Kur ata që e shpallin emrin e Krishtit do të praktikojnë parimet e rregullit së artë, e njëjta fuqi do të shoqërojë ungjillin si në kohët apostolike. (Mendime nga Mali i Bekimeve, fq. 137)

Fokus Lutjeje

Lutuni që Fryma e Shenjtë të mbushë çdo anëtar të familjes dhe miqtë tuaj me gëzimin e Jezusit në dhurimin sakrifikues për të përparuar misionin e Tij në botë.

FAMILJA E KISHËS**Mirëseardhja****Adhurim përmes Lutjes**

DREJTUESI U THOTË TË GJITHËVE: Uluni duke formuar grupet tuaja të vogla. Ekipi ynë i lutjes do ta ftojë grupin tuaj të vogël të lutet përmes Fjalës së Perëndisë. Pasi të jeni lutur për disa minuta, do të dëgjoni ekipin e lutjes që këndon një strofë të një kënge. Kur ta dëgjoni, ju lutemi përfundojeni lutjen dhe filloni të këndonni.

Tregoni:

1. **(GRUPET E VOGLA)** Lexoni Psalmin 78:4. Ndani me grupin tuaj gjërat e çmuara që keni parë Zotin të bëjë në jetën tuaj gjatë 10 Ditëve të Lutjes.
2. **(TË GJITHË)** Këndoni një këngë mirënjohjeje për bekimet.

Kërkim Faljeje:

1. **(GRUPET E VOGLA)** Lexoni Psalmin 78:5–7, 11. Kërkoni falje se kemi harruar sa shumë ka bërë Zoti për ne. Lutuni për faljen e Tij.
2. **(TË GJITHË)** Këndoni një këngë për falje ose shpengim.

Kërkesa:

1. **(GRUPET E VOGLA)** Lexoni Psalmin 78:23, 24. Lutuni që Fryma e Shenjtë të na japë zemrën e Atit tonë. Ndihmoni që të japim bujarisht ashtu siç Ai na jep ne.
2. **(TË GJITHË)** Këndoni një këngë për përkushtim ose gatishmëri.

Dëshmi:

(GRUPET E VOGLA) Formoni grupe prej 2–3 vetash. Pyetni dhe përgjigjuni: “Çfarë na ndihmoi Zoti të bënim me Sfidën 24-orëshe të djeshme?”

(Sfida: Kërkojini Zotit t’ju tregojë dikë të harruar në komunitet dhe nevojën e tij. Shkoni dhe i shërbeni atij në emër të Jezusit para takimit të nesërm.)

Aktivitet

DREJTUESI: Pyetni në grupin tuaj: “Cila do të ishte një gjë e lehtë (por kuptimplotë) për t’u dhënë?” Lejoni secilin të përgjigjet. Pastaj pyetni: “Cila do të ishte gjëja më e vështirë për t’u dhënë?”

Adhurim përmes Biblës

(GRUPET E VOGLA) Lexoni **Veprat 4:32–37**. Çfarë e motivoi bujarinë e këtyre anëtarëve të kishës në Veprat? Në çfarë mënyre do të ndryshonte komuniteti dhe familja jonë e kishës nëse do të praktikoheshin ndarjet si në këtë pasazh?

Mendime nga Ellen White:

Kështu ndodh gjithmonë kur Fryma e Perëndisë merr nën kontroll jetën. Ata që kanë zemrat e mbushura me dashurinë e Krishtit do të ndjekin shembullin e Atij që për shkakun tonë u bë i varfër, që përmes varfërisë së Tij ne të pasurohemi. Paraja, koha, ndikimi, të gjitha dhuratat që kanë marrë nga Perëndia do t'i vlerësojnë vetëm si mjet për të përparuar punën e ungjillit. Kështu ishte në kishën e hershme dhe kur në kishën e sotme shihet se përmes fuqisë së Frymës anëtarët e kishës kanë larguar dëshirat e tyre nga gjërat e botës dhe janë të gatshëm të bëjnë sakrifica që bashkëqytetarët të dëgjojnë ungjillin, të vërtetat e shpallura do të kenë ndikim të fuqishëm tek dëgjuesit. (Veprat e Apostujve, fq. 71)

Fokus Lutjeje

DREJTUESI U THOTË TË GJITHËVE: Në grupet tuaja, lutuni që Zoti t'ju mbushë me dashurinë e Tij të thellë për të humburit. Lutuni që Zoti të zëvendësojë zemrat egoiste me zemra bujare dhe sakrifikuese që të mund të përmbushim misionin e fundit për të arritur çdo shpirt para se Ai të kthehet.

Thirrje

DREJTUESI U THOTË TË GJITHËVE: Kush është sot i bindur nga Fryma e Shenjtë të ofrojë gjithçka që Zoti i ka dhënë për të përparuar ungjillin e Jezus Krishtit? Ejani dhe bashkohuni me mua në dorëzimin e kohës, talenteve, pasurive dhe ndikimit tuaj tek Krishti.

Sfida 24-orëshe

DREJTUESI U THOTË TË GJITHËVE: Pyeteni Zotin se cilën dhuratë specifike mund t'i jepni Atij: kohën, talentin ose paratë tuaja, që të përparojë ungjilli tani. Kur Ai t'ju tregojë, jepeni këtë dhuratë me gëzim, sakrificë dhe pa e menduar dy herë, vetëm për lavdinë e Jezusit!